

四庫全書

史部

欽定四庫全書

通志卷三十九

宋右廸功郎鄭樵漁仲撰

天文略第二

太微宮 紫微宮 天市垣 天漢起沒 十二

次度數 州郡躔次 七曜

太微宮

上元太微宮昭昭列象布蒼穹端門只是門之中左右

執法門西東門左皂衣一謁者以次即是烏三公三黑
九卿公背傍五黑諸侯卿後行四箇門西主軒屏五帝
內坐於中正幸臣太子并從官烏列帝後從東定郎將
虎賁居左右常陳郎位居其後常陳七星不相誤郎位
陳東一十五兩面宮垣十星布左右執法是其數宮外
明堂布政宮三箇靈臺候雲雨少微四星西南隅長垣
霍霍微西居北門西外接三台與垣相對無兵災

太微垣十星在翼軫北張衡云天子之宮庭五帝之

坐十二諸侯府也其外蕃九卿也一曰軒轅為權太
微為衡衡主平也隋志云又為天庭理法平辭監升
授德列宿受符諸神考節舒情稽疑也南蕃中一星
間曰端門東曰左執法廷尉之象也西曰右執法御
史大夫之象也執法所以舉刺凶奸者也左執法之
東左掖門也右執法之西右掖門也東蕃四星南第
一曰上相其北東太陽門也第二星曰次相其北中
華東門也第三星曰次將其北東太陰門也第四星

曰上將所謂四輔也西蕃四星南第一星曰上將其
北西太陽門也第二星曰次將其北中華西門也第
三星曰次相其北西太陰門也第四曰上相亦四輔
也東西蕃有芒及動搖者諸侯謀天子也執法移則
刑罰尤急月五星入太微軌道吉其所犯中坐成刑
謁者一星在太微內左執法東北主贊賓客也不見
外國不賓服謁者東北三星曰三公內坐朝會之所
居也張衡云以輔弼帝者其名與夾斗三公同三公

北三星曰九卿內坐主治萬事與天紀同占九卿西
五星曰內五諸侯內侍天子不之國也辟雍之禮得
則太微諸侯明屏四星在端門內帝坐南近右執法
屏所以擁蔽帝庭也執法主刺舉星大明潤則君臣
有禮黃帝內坐一星在太微中含樞紐之神也天子
動得天度止得地意從容中道則太微五帝之坐明
以光黃帝坐不明人主當求賢士以輔治不然則奪
勢又曰太微五帝坐小弱青黑天子國亡四帝內坐

四星夾黃帝坐東方星蒼帝靈威仰之神也南方星
赤帝赤熛怒之神也西方星白帝白招矩之神也北
方星黑帝叶光紀之神也張衡云五帝同明而光則
天下歸心不然則失位金火水入太微若順入軌道
伺其出之所守之分則為天子所誅也帝坐東北一
星曰幸臣主親愛臣明則幸臣用事微細吉太子一
星在幸臣西五帝坐北儲貳之星明而潤則太子賢
不然則否金火守入太子不廢則為篡逆之事從官

一星在太子西北主從官不見則帝不安如常則吉
郎將一星在郎位東北所以為武備張衡云今左右
中郎將是也大明芒角將怒不可當也虎賁一星在
太微西蕃之外上相之西下台之南靜室旄頭之騎
官也張衡云主侍從之武臣也與車騎同占常陳七
星如畢狀在郎位北天子宿衛虎賁之士以設彊毅
也星搖動天子自出明則武兵用微則武兵弱郎位
十五星又云二十四星在帝坐東北一曰依烏郎位

也周官之元士漢官之光祿中散騎諫議議郎三署郎中是其職也張衡又云今之尚書郎也欲其大小相均光潤有常吉隋志郎位主守衛也其星明大臣有劫主又曰客犯上其星不具后死幸臣誅客星入之大臣爲亂明堂三星在太微西南角外天子布政之官也明吉暗凶明堂西三星曰靈臺主觀雲物察符瑞候災變也占與司怪同少微長垣二坐星已釋在張星之次矣三台六星兩兩而居起文昌列招搖

太微一曰天柱三公之位也在天曰三台主開德宣
符也西近文昌二星曰上台為司命主壽次二星對
軒轅曰中台為司中主宗室東二星抵太微曰下台
為司祿主兵所以昭德塞違也又曰三台為天階太
一躡以上下一曰泰階上階上星為天子星下星為
女主中階上星為諸侯三公下星為卿大夫下階上
星為士下星為庶人所以和陰陽而理萬物也其星
有變各以所主占之君臣和集如其常度張衡云色

齊明而行列相類則君臣和法令平不齊為平度金
火守入兵起彗孛尤甚也

北極紫微宮

中元北極紫微宮北極五星在其中大帝之坐第二珠
第三之星庶子居第一號曰為太子四為后宮五天樞
一云第三明者帝之居第四名曰四庶子最小第五天之樞左右四星是四輔天一

太一當門路左樞右樞夾南門兩面營衛一十五上宰
少尉兩相對少宰上輔次少輔上衛少衛次上丞後門

東邊大贊府門西喚作一少丞以次却向前門數陰德
門裏兩黃聚尚書以次其位五女史柱史各一戶御女
四星五天柱大理兩星陰德邊勾陳尾指北極顛勾陳
六星六甲前天皇獨在勾陳裏五帝內坐後門是華蓋
并杠十六星杠作柄象蓋傘形蓋上連連九箇星名曰
傳舍如連丁垣外左右各六珠右是內階左天廚階前
八星名八穀廚下五箇天棓宿天牀六星左樞在內廚
兩星右樞對文昌斗上半月形希疎分明六箇星文昌

之下曰三公太尊只向三公明天牢六星太尊遶太陽之守四勢前一箇宰相太陽側更有三公相西偏即是

元戈一星圓天理四星斗裏暗輔星近着開陽淡

一本云文

昌之下三師名天牢六星四勢前更有三公相西偏即是太陽一星圓天理四星斗裏暗輔星近着闔陽淡

北斗之宿七星明第一主帝名樞精第二第三璇璣星第四名權第五衡闔陽搖光六七名

北極五星在紫微宮中一名天極一名北辰其紐星天之樞也天運無窮三光迭耀而極星不移故曰居

其所而衆星拱之第一星主月太子也第二星主日
帝王也亦為太一之坐謂最赤明者也第三星主五
星庶子也北極五星最為尊也中星不明主不用事
右星不明太子憂也其第四星為后宮第五星為天
樞張衡云二星並為後宮北極五星明大則吉變動
則憂抱樞四星曰四輔所以輔佐北極而出度授
政也張衡云抱樞之細星也為輔臣之位主贊萬機
小而明吉大明及芒角臣逼君暗則官不理天一一

星在紫宮門右星之南天帝之神也主戰鬪知人吉凶者也太一一星在天一南相近亦天帝神也主使十六神知風雨水旱兵革饑饉疾疫災害所生之國也張衡云天一遍闔闔外其占明而有光則陰陽和合萬物成人主吉不然反是太一占與天一略同紫宮垣十五星其西藩七東藩八在北斗之北一曰紫微大帝之坐也天子之常居也主命主度也一曰長垣一曰天營一曰旗星為藩衛備藩臣也宮闕兵起

旗星直天子出自將宮中兵張衡云紫微垣十五星
東藩八西藩七其東藩近閭闔門第一星為左樞第
二星為上宰第三星為少宰第四星為上輔第五星
為少輔第六星為上衛第七星為少衛第八星為少
丞其西藩近閭闔門第一星為右樞第二星為少尉
第三星為上輔第四星為少輔第五星為上衛第六
星為少衛第七星為上丞皆以大明有常則吉若盛
明則內輔盛也宮垣直而明天子將兵開則兵起西

藩正南開如門象名閭闔門有流星自門而出四野者當有中使銜命視其所適分野而論之也陰德二星在紫微宮內尚書之西主施德者其占以不明為宜明則新君踐極隋志曰尚書西二星曰陰德陽德主周急振撫又分為二坐星矣門內東南維五星曰尚書主納言夙夜咨謀龍作納言比之象也張衡曰八坐大臣之象其占與四輔不殊極東一星曰柱下史主左右記君之過星明則史直辭不明反是柱史

北一星曰女史婦人之微者主傳漏故漢有侍史張
衡云婦官也主記宮內之事其占與柱史同御女下
四星在紫微宮內勾陳之北八十一御妻之象也其
占明則多內寵不明則否晉志謂之女御宮天柱五
星在紫微宮門內華蓋杠左傍近東垣北隅法五行
主晦朔晝夜之職明正則吉人安陰陽調不然則司
歷過隋志云建政教立圖法之府也常以朔望日垂
禁令於天柱以示百司周禮以正歲之月示法象魏

此之謂也大理二星在紫微門內次近陰德決獄之
官星明則刑憲平不明則冤酷深勾陳六星在紫微
宮華蓋之下隋志云後宮也大帝之正妃也大帝之
常居也張衡云大帝所居之宮也亦將軍之象也星
明則吉暗則人主惡之勾陳口一星曰天皇亦曰大
帝其神曰曜魄寶主御羣靈秉萬機神圖也其星隱
而不見見則為災六甲六星在紫微宮內華蓋杠左
傍分掌陰陽紀時節明則陰陽和不明則寒暑易節

五帝內坐五星在華蓋下勾陳上斧扆之象所以備
宸居者明正則吉變動則災凶隋志云客星犯紫宮
中坐大臣犯主華蓋七星其杠九星合十六星在勾
陳上正當大帝所以覆蔽大帝之坐也明正則吉傾
動則凶傳舍九星在華蓋上近河賓客之館主胡人
入中國客星守之備姦使亦曰胡兵起內階六星在
文昌北天皇之陞也明吉傾動凶紫微東垣北維外
六星曰天廚天子百官之廚也見吉不見凶八穀八

星在紫微西藩之外五車之北其八星一主稻二主
黍三主大麥四主小麥五主大豆六主小豆七主粟
八主麻子明則八穀皆成暗則不熟一星不見則一
穀不登八星不見則國人餬口天棐五星在女牀東
北天子先驅所以禦難也不明則國兵起一曰主爭
訟明大凶小吉天牀六星當閭闔門外主天子寢舍
解息燕休之處星正大吉君有慶傾則人主不安一
云在宮門外聽政之象也為寢舍也暗凶內廚兩星

在紫垣外西南角主六宮之內飲食府也一云主后夫人與太子宴飲居常無咎有犯守凶文昌六星在北斗魁前天之六府也主集計天道一曰上將大將軍建威武二曰次將尚書正左右三曰貴相太常理文緒四曰司祿司中司隸賞功進爵五曰司命司怪太史主滅咎六曰司寇大理佐理實所謂一者起北斗魁前近內階者也明潤大小齊天瑞臻張衡云其占黃潤光明萬人安大小均天瑞降青黑細微多所

害搖動移徙大臣憂金火守入兵興字彗犯國亂一
曰文昌動則三公受誅后崩災福與三公同三公三
星在北斗柄東又三公星在北斗魁西並為太尉司
空司徒之象主燮理陰陽弼君機務其星移徙不吉
居常安金火守之三公有凶隋志曰杓南三星及魁
第一星皆曰三公宣德化調七政和陰陽之官也太
尊一星在中台之北貴戚也巫咸云聖公之象居常
為定不見則凶金犯守為災貴賤將敗者也天牢六

星在北斗魁下貴人之牢也主愆過禁暴淫與貫索
同占太陽守一星在相西大將大臣之象也主戒不
虞設武備也非其常兵起明吉暗凶移徙大臣誅勢
四星在太陽守西北刑餘人而用事者也不明吉明
即閹官擅權相一星在北斗南隋志曰相者總領百
官而掌邦教以佐帝王安邦國集衆事也明吉元戈
一星在招搖北亦曰天戈也芒角大而動則四夷兵
起其占與梗河相類北斗魁中四黑星為貴人之牢

曰天理明及搖動與有星者為貴人下獄北斗七星
輔一星在太微北七政之樞機陰陽之元本也故運
乎天中而臨制四方以建四時而均五行也魁四星
為璇璣杓三星為玉衡又曰斗為人君之象號令之
主又為帝車取乎運動之義也又魁第一星曰天樞
二曰璇三曰璣四曰權五曰玉衡六曰開陽七曰搖
光一至四為魁五至七為杓樞為天璇為地璣為人
權為時玉衡為音開陽為律搖光為星石氏云第一

曰正星主陽德天子之象也二曰法星主陰刑女主之位也三曰令星主禍害也四曰伐星主天理伐無道五曰殺星主中央助四旁殺有罪六曰危星主天倉五穀七曰部星亦曰應星主兵又云一主天二主地三主火四主水五主土六主木七主金又曰一主秦二主楚三主梁四主吳五主趙六主燕七主齊輔星附乎開陽所以佐斗成功也又曰主危正矯不平又曰丞相之象也七政星明則國昌不明國殃斗旁

欲多星則安斗中少星則人怨上天下多訟德者無
星二十日有輔星明而斗不明臣彊主弱斗明輔不
明主彊臣弱也杓南三星及魁第一星皆曰三公宣
德化調七政和陰陽之官也張衡云若天子不恭宗
廟不敬鬼神則魁第一星不明或變色若廣營宮室
妄鑿山陵則第二星不明或變色若不受百姓驟興
征役則第三星不明或變色若發號施令不順四時
不明天道則第四星不明或變色若廢正樂務淫聲

則第五星不明或變色若不勸農桑不務稼穡峻法
濫刑退賢傷政則第六星不明或變色若不撫四方
不安夷夏則第七星不明或變色凡日月暈連環及
斗月暈及搖動兵起其傍及中小星多則天下不安
人多怨一云小星多則天下安不然則國人散五曜
及客星守入皆凶孛彗尤甚也

天市垣

下元一宮名天市兩扇垣牆二十二當門六角黑市樓

門左兩星是車肆兩箇宗正四宗人宗星一霍亦依次
帛度兩星屠肆前候星還在帝坐邊帝坐一星常光明
四箇微茫宦者星以次兩星名列肆斗斛帝前依其次
斗是五星斛是四垣北九箇貫索星索口橫者七公成
天紀恰似七公形數着分明多兩星紀北三星名女牀
此坐還依織女傍三元之象無相侵二十八宿適其陰
水火木土并與金以次別有五行分

天市垣二十二星在房心東北主權衡主聚衆一曰

天旗庭主斬戮之事也市中星衆潤澤則歲實星稀則歲虛熒惑守之戮不忠之臣又曰若怒角守之者臣殺主彗星出為徙市易都客星入之兵大起出之有貴喪張衡曰天市明則市吏急商人無利忽忽暗則反是市樓六星在市中臨箕星之上主司闡闡明則吉暗則市吏不理也隋志市樓者市府也主市價律度其陽為金錢其陰為珠玉變見各以所主占之車肆二星在天市垣南門之內主車駕不明則國車

盡行隋志主衆賈之區宗正二星在帝坐東南宗大
夫也彗星守之若失色宗正有事客星守動則天子
親屬有變又曰客星守之貴人死又曰宗正明則宗
室有秩暗則國家凶宗人四星在宗正東主錄親疎
享祀如綺文而明正族人有序宗星二星在宗人東
北候星之東宗室之象帝輔血脉之臣也客星守之
宗人不和帛度二星在宗星東北主度量明則尺量
平商人不欺暗則否屠肆三星在帛度東北主烹宰

明大則肆中多宰殺候一星在帝坐東北主伺陰陽也明大輔臣彊四夷開候細微則國安亡則主失位移則主不安居常則吉帝坐一星在天市中候星西天庭也光而潤則天子吉威令行微小凶大人當之或云暗則大人不正張衡云帝坐者帝王之坐帝坐有五一坐在紫微宮一坐在大角一坐在心中一坐在天市垣一坐在太微宮咸云帝坐一曰神農所居不見則大人當其咎宦者四星在帝坐西南帝傍之

閭人也星微則吉明則凶非其常官者有憂其占與
勢星同列肆二星在斛西北主寶玉之貨移徙則列
肆不安火守入兵大起斗五星在官者西南主平量
覆則歲熟仰則大饑明暗與帛度同斛四星在市樓
北亦曰天斛主量者也占與斗同貫索九星在七公
前一日連索一曰連營一曰天牢主法律禁暴彊也
牢口一星為門欲其開也九星皆明天下獄煩七星
見小赦五星見大赦動則斧鑕用中空則更元漢志

云十五星張衡云貫索開有赦不見即刑獄簡若閉口及星入牢中有繫死者常以午子夜俟之一星不見則有小喜二星不見賜祿三星不見人主德令行且赦若客出視其小大大有大赦小有小赦或云貫索為賤人之牢一星芒有喜事二星芒賜爵祿三星芒有赦門閉牢中多死水犯災火犯米貴七公七星在招搖東天之相也三公之象張衡云七公橫列貫索之口主執法列善惡之官也星齊正則國法平差

戾則獄多冤酷或云星入河米貴火犯之兵起天紀
九星在貫索東九卿也為九河主萬事之紀理冤訟
也明則天下多辭訟亡則政理壞國紀亂散絕則地
震山崩女牀三星在天紀之北為後宮御女主女事
明則宮人恣意常則無咎

魏石申以赤點紀星共一百三十八座計八百十
星商巫咸以黃點紀星共四十四座計一百四十
四星齊甘德以黑點紀星共一百一十八座計五

百十一星三家都紀三百座計一千四百六十五
星此舊書所紀傳寫之訛數目參差無所考正

天漢起沒

臣謹按天漢舊有圖無歌故為之補

天河亦一名天漢起自東方箕尾間遂乃分為南北道
南經傳說入魚淵開簾戴弁鳴河鼓北經龜宿貫箕邊
次絡斗魁冒左旗又合南道天津湄二道相合西南行
分夾瓠瓜絡人星杵畔造父騰蛇精王良附路閣道平

登此大陵泛天船直到卷舌又南征五車駕向北河南
東井水位入吾驂水位過了東南游經次南河向闕邱
天狗天紀與天稷七星南畔天河沒

天漢起東方經箕尾之間謂之天河亦謂之漢津乃
分為二道其南經傳說魚天簫天弁河鼓其北經龜
貫箕下次絡南斗魁左旗至天津下而合南道乃西
南行又分夾瓠瓜絡人星杵造父騰蛇王良附路閣
道北端太陵天船卷舌而南行絡五車經北河之南

入東井水位而東南行絡南河闕邱天狗天紀天稷
在七星南而沒張衡云津漢者金之氣也其占曰水
漢中星多則水少則旱

十二次度數

十二次班固取三統厯十二次配十二野其言最詳又
有費直說周易蔡邕月令章句所言頗有先後魏太史
令陳卓更言郡國所入宿度今附而次之

自軫十二度至氐四度為壽星於辰在辰鄭之分野屬

兗州

費直周易分野壽星起軫七度
蔡邕月令章句壽星起軫八度

自氐五度至尾九度為大火於辰在卯宋之分野屬豫

州

費直起氐十一度
蔡邕起亢八度

自尾十度至南斗十一度為析木於辰在寅燕之分野

屬幽州

費直起尾九度
蔡邕起尾四度

自南斗十二度至須女七度為星紀於辰在丑吳越之

分野屬揚州

費直起斗十度
蔡邕起斗六度

自須女八度至危十五度為元枵於辰在子齊之分野

屬青州

費直起女六度
蔡邕起女二度

自危十六度至奎四度為娵訾於辰在亥衛之分野屬

并州

費直起危十四度
蔡邕起危十度

自奎五度至胃六度為降婁於辰在戌魯之分野屬徐

州

費直起奎二度
蔡邕起奎八度

自胃七度至畢十一度為大梁於辰在酉趙之分野屬

冀州

費直起婁十度
蔡邕起胃一度

自畢十二度至東井十五度為實沈於辰在申魏之分

野屬益州

費直起畢九度
蔡邕起畢六度

自東井十六度至柳八度為鶉首於辰在未秦之分野

屬雍州

費直起井十二度
蔡邕起井十度

自柳九度至張十六度為鶉火於辰在午周之分野屬

三河

費直起柳五度
蔡邕起柳三度

自張十七度至軫十一度為鶉尾於辰在巳楚之分野

屬荊州

費直起張十三度
蔡邕起張十二度

州郡躔次

陳卓范蠡鬼谷先生張良諸葛亮譙周京房張衡並云
角亢氐鄭兗州

東郡入角一度 東平任城山陽入角六度 濟
北陳留入亢五度 濟陰入氐一度 東平入氐
七度 泰山入角十二度

房心宋豫州

潁川入房一度 汝南入房二度 沛郡入房四
度 梁國入房五度 淮陽入心一度 魯國入

心三度 楚國入心四度

尾箕燕幽州

涼州入箕中十度 上谷入尾一度 漁陽入尾

三度 右北平入尾七度 西河上郡北地遼西

東入尾十度 涿郡入尾十六度 渤海入箕一

度 樂浪入箕三度 元菟入箕六度 廣陽入

箕九度

斗牽牛湏女吳越揚州

九江入斗一度 廬江入斗六度 豫章入斗十
度 丹陽入斗十六度 會稽入牛一度 臨淮
入牛四度 廣陵入牛八度 泗水入女一度
六安入女六度

虛危齊青州

齊國入虛六度 北海入虛九度 濟南入危一
度 樂安入危四度 東萊入危九度 平原入
危十一度 菑川入危十四度

營室東壁衛并州

安定入營室一度 天水入營室八度 隴西入

營室四度 酒泉入營室十一度 張掖入營室

十二度 武都入東壁一度 金城入東壁四度

武威入東壁六度 敦煌入東壁八度

奎婁胃魯徐州

東海入奎一度 琅琊入奎六度 高密入婁一

度 城陽入婁九度 膠東入胃一度

昂畢趙冀州

魏郡入昂一度 鉅鹿入昂三度 常山入昂五
度 廣平入昂七度 中山入昂八度 清河入
昂九度 信都入畢三度 趙郡入畢八度 安
平入畢四度 河間入畢十度 真定入畢十三
度

甯參魏益州

廣漢入甯一度 越雋入甯三度 蜀郡入參一

度 捷為入參三度 牂柯入參五度 巴蜀入
參八度 漢中入參九度 益州入參七度

東井輿鬼秦雍州

雲中入東井一度 定襄入東井八度 雁門入
東井十六度 代郡入東井二十八度 太原入
東井二十九度 上黨入輿鬼二度

柳七星張周三輔

弘農入柳一度 河南入七星三度 河東入張

一度 河內入張九度

翼軫楚荊州

南陽入翼六度 南郡入翼十度 江夏入翼十

二度 零陵入軫十一度 桂陽入軫六度 武

陵入軫十度 長沙入軫十六度

七曜

日循黃道東行一日一夜行一度三百六十五日有奇
而周天行東陸謂之春行南陸謂之夏行西陸謂之秋

行北陸謂之冬行以成陰陽寒暑之節是故傳云日為
太陽之精主生養恩德人君之象也人君有瑕必露其
慝以告示焉故日月行有道之國則光明人君吉昌百
姓安寧日變色有暈軍破無暈喪侯王其君無德其臣
亂國則日赤無光日失色所臨之國不昌日晝昏行人
無影到暮不止上刑急下人不聊生不出一年有大水
日晝昏烏鳥羣鳴國失政日中烏見主不明為政亂國
有白衣會將軍出旌旗舉日中有黑子有黑氣黑雲乍

三乍五臣廢其主日食陰侵陽臣掩君之象有亡國有死君有大水日食見星有殺君天下分裂王者修德以禳之

月者太陰之精也其形圓其質清日光照之則見其明日光所不照則謂之魄故月望之日日月相望人居其間盡覩其明故形圓也二弦之日日照其側人觀其傍故半魄也晦朔之日日照其表人在其裏故不見也其行有遲疾其極遲則日行十二度彊極疾則日行十四

度半彊遲則漸疾疾極漸遲二十七日半彊而遲疾一終矣又月行之道斜帶黃道十三日有奇在黃道表又十三日有奇在黃道裏表裏極遠者去黃道六度二十七日有奇陰陽一終張衡云對日之衝其大如日日光不照謂之闇虛闇虛逢月則月食值星則星亡今厯家月望行黃道則值闇虛矣值闇虛有表裏深淺故食有南北多少月為太陰之精以之配日女主之象也以之比德刑罰之義列之朝廷諸侯大臣之類故君明則月

行依度臣執權則月行失道大臣用事兵刑失理則月
行乍南乍北女主外戚擅權則或進或退月變色將有
殃月晝明姦邪並作君臣爭明女主失行陰國兵彊中
國饑天下謀僭數月重見國以亂亡

臣謹按丹元子二十八宿及三元之歌所以為美者
以其句中有圖言下見象而不談災祥至五行有五
篇吟則反是且五星為緯而行無定體可以算數推
難以圖象求今五行吟既無圖象之理而極論災祥

未必丹元子之作也其言濫誣在所不取

歲星曰東方春木於人五常仁也五事貌也仁虧貌失
逆春令傷木氣則罰見歲星歲星盈縮以其舍命國其
所居久其國有德厚五穀豐昌不可伐其對為衝歲乃
有殃歲星安靜中度吉盈縮失次其國有變不可舉事
用兵又曰人主出象也色欲明光潤澤德合同又曰進
退如度姦邪息變色亂行主無福又主福主大司農主
齊吳主司天下諸侯人君之過主歲五穀赤而角其國

昌赤黃而沉其野大穰張衡云歲星者東方之精蒼帝
之子一名攝提一名重華一名應星一名紀星晉灼曰
太歲在四仲則歲行三宿太歲在四孟四季則歲行二
宿二八十六三四十二而行二十八宿十二歲而周天
熒惑曰南方夏火禮也視也禮虧視失逆夏令傷火氣
罰見熒惑熒惑法使行無常出則有兵入則兵散各以
其舍命國為亂為賊為疾為喪為飢為兵所居國受殃
環繞鉤已芒角動搖變色乍前乍後乍左乍右其殃愈

甚其南丈夫北女子喪周旋止息乃為死喪寇亂其野
亡地其失行而速兵聚其下順之戰勝又曰熒惑主大
鴻臚主死喪主司空又為司馬主楚吳越以南又司天
下羣臣之過司驕奢亡亂妖孽主歲成敗又曰熒惑不
動兵不戰有誅將其出色赤怒逆行成鉤已戰凶有圍
軍鉤已有芒角如鋒刀人主無出宮下有伏兵芒大則
人民怒君子遑遑小人浪浪不有亂臣則有大喪人欺
吏吏欺王又為理外則理兵內則理政為天子之理也

故曰雖有明天子必視熒惑所在其入守犯太微軒轅
營室房心主命惡之張衡云熒惑為執法之星其精為
風伯之師或童兒歌謠嬉戲晉灼曰熒惑常以十月則
入朝太微受制而出行列宿司無道出入無常也二歲
而周天

填星曰中央季夏土信也思心也仁義禮智以信為主
貌言視聽以心為政故四星皆失填乃為之動動而盈
侯王不寧縮有軍不復所居之宿國吉得地及女子有

福不可伐去之失地若有女憂居宿久國福厚易則薄
失次而上二三宿曰盈有主命不成不乃大水失次而
下曰縮后戚其歲不復不乃天裂若地動一曰填為黃
帝之德女主之象主德厚安危存亡之機司天下女主
之過又曰天子之星也天子失信則填星大動張衡云
填星者黃帝之子女主之象也一名地候晉灼曰常以
甲辰之始建斗之歲填行一宿二十八歲而周天

太白曰西方秋金義也言也義虧言失逆秋令傷金氣

罰見太白太白進退以候兵高卑遲速靜躁見伏用兵
皆象之吉其出西方失行夷狄敗出東方失行中國敗
未盡期曰過參天病其對國若經天天下草人更王是
謂亂紀人民流亡晝與日爭明彊國弱小國彊女主昌
又曰太白主大臣其號上公也大司馬位謹候此張衡
云太白者白帝之子一名火政一名官星一名明堂一
名文表一名太皞一名終星一名天相一名天浩一名
序星一名梁星一名威星一名大囂一名大爽晉灼曰

常以正月甲寅與熒惑晨出東方二百四十日而入
四十日又出西方二百四十日而入入三十五日而復
出東方出以寅戌入以丑未一歲而周天

辰星曰北方冬水智也聽也智虧聽失逆冬令傷水氣
罰見辰星辰星見則主刑主廷尉主燕趙又為燕趙代
以比宰相之象亦為殺伐之氣戰鬪之象又曰軍於野
辰星為偏將軍之象無軍為刑事和陰陽應効不効其
時不和出失其時寒暑失其節邦當大饑當出不出是

謂擊卒兵大起在於房心間地動亦曰辰星出入躁疾
常主夷人又曰蠻夷之星也亦主刑法之得失色黃而
小地大動光明與月相逮其國大水張衡云辰星一名
勾星一名爨星一名伺星晉灼曰常以二月春分見奎
婁五月夏至見東井八月秋分見角亢十一月冬至見
牽牛出以辰戌入以丑未二旬而入晨候之東方夕候
之西方一歲而周天

通志卷三十九

欽定四庫全書

史部
通志卷四十

詳校官侍讀_臣陳萬青

編修_臣裴謙覆勘

覆校官助教_臣金學詩

校對官典簿_臣劉光第

謄錄監生_臣王寶唐

欽定四庫全書

通志卷四十

宋右迪功郎鄭樵漁仲撰

地理略第一

序 四瀆 歷代封畛 開元十道圖

地理序

州縣之設有時而更山川之形千古不易所以禹貢分州必以山川定經界使兗州可移而濟河之兗不能移

使梁州可遷而華陽黑水之梁不能遷是故禹貢為萬
世不易之書後之史家主於州縣州縣移易其書遂廢
今之地里以水為主水者地之脉絡也郡縣碁布州道
瓜分皆由水以別焉中國之水則江河淮濟為四瀆諸
水所歸苟明乎此則天下可運於掌

四瀆

滙

若

淹

浯

羌

巴

白

潛水禹貢沱潛既道者此也舊云出巴郡宕渠縣南
入于江今宕渠省入蓬州伏虞

渝

巫溪

沮水亦作睢出房州房陵縣景山景山在荆山西百餘里即荆山首也一名發阿山故杜云出新城郡之西南發阿山東南至當陽漳水入焉又東南至枝江入江枝江近并入松滋隸江陵此水在郢都之西故楚昭王西走涉沮

漳水出臨沮縣東荆山臨沮今襄陽南漳縣東南至當陽縣右入于沮當陽今隸荆門軍

褒

文

旬

涓

淮

教

白水杜云江夏景陵縣西有白水出聊屈山西南入
漢按景陵今復州景陵

澧水舊云出義陽厥縣西北黃山厥縣後為厥西隋廢入隋縣其水南入于澗

涓水舊云出蔡陽縣大洪山蔡陽今隋州唐城其水東南至隋縣有澧水入焉又南過安陸入于夏水

漢水名雖多而實一水說者紛然其原出興元府西縣嶓冢山為漾水東流為沔水故地曰沔陽又東至南鄭為漢水有褒水從武功來入焉南鄭興元治興元故漢中郡也又東左與文水會又東過西城旬水

入焉又東過鄆鄉縣南又屈而東南過武當縣又東過順陽縣有清水自號州盧氏縣北來入焉又東過中廬別有淮水自房陵淮山東流入焉又東過南漳荆山而為滄浪之水或云在襄陽即為滄浪之水又東南過宜城有鄆水入焉又東過郢敖水入焉又東南白水入焉又東過雲杜而為夏水有涓水入焉雲杜後并入安州安陸舊屬江夏郡又東至漢陽觸大別山南入于江漢陽故夏口之地班云行二千七百

六十里

鄢水本夷水亦謂之蠻水出房陵今房州治也東南至宜城縣羅川城謂之鄢水又東至蠻城謂之湛水又東入漢蠻城在宜城東三十里靈王浴夏將入鄢杜云順漢水南至鄢

彭水杜云出新城昌魏

邗溝水一名韓江一名邗溟溝吳將伐齊霸中國故於廣陵城東南築邗城城下掘深溝東北通射陽湖

西北至末口入淮通江於淮以便糧道邳城今在揚
州江都末口在楚州山陽而射陽湖亦在楚州然此
乃舊通江淮之道後來以湖道多風晉永和中陳敏
更由津湖興寧中復以津湖多風又自湖之南沿東
岸二十里穿渠入北口北口即末口自後行者不復
由湖然自末口入淮又自彼沂淮達盱眙然後入汴
猶有淮患宋朝復穿令徑達盱眙入汴

江水出岷山一名瀆山一名汶阜山今屬茂州汶山

縣發源不一亦甚微所謂發源濫觴者也東南百餘里至天彭山亦謂之天谷亦謂之天彭門兩山相對水徑其間其山屬今彭州又東南過成都郫縣又東南過江陽有湔水從西北來入焉江陽隋并入隆山唐改為彭山今屬眉州又南過嘉州犍為又南過戎州犍道縣北若水淹水從西來入焉又東南至巴郡江州縣有羌水涪水巴水白水潛水渝水合流入焉故庾仲雍謂江州縣對二水口右則涪內水左則巴

內水是也江州縣今渝州江津縣是又東過涪州忠
州萬州又東過雲安軍雲安故朐虂縣後周改名又
東過魚復魚復今夔州奉節也逕永安宮及諸葛亮
圖壘南又東南過赤岬城又東過巫峽巫溪水入焉
又東過秭歸又東過夷陵又東過宜都又東過禹斷
江又東過枝江有沮水入焉又東過石首又東過華
容有涌水入焉又東至巴陵合于洞庭之陂其陂有
澧水從西來入焉次有沅水從西南來入焉次有湘

水從南來入焉共而東出由武昌出與漢水合而為
大江東過九江有九江水合而為彭蠡陂從南來入
焉又東右過江寧有丹陽水從南來入焉又東左過
江都邦溝出焉又東過江陰許浦入海班云行二千
六百六十里謬矣

丹陽

桐水出廣德軍西南白石山西北入丹陽湖

彭蠡

湘

沅

澧

涌水在華容縣入江樂史云涌水在江陵府監利縣界

沱水禹貢文謂岷山導江東別為沱班固謂從郾縣分而東流至枝江入江今詳之不然疑禹貢之文有衍闕

汝水出汝州魯山縣大孟山其地與弘農盧氏接界
故許慎誤謂出盧氏也其水東南過故定陵縣渚水
及昆水入焉又有沘水湛水入焉定陵今許州舞陽
又東南過上蔡至襄信縣汝口南入于淮班云行千
三百四十里

湛水舊云出犇縣魚齒山東至定陵入汝疑犇後來
并入葉而定陵乃舞陽

沘水舊云出魯陽東經襄城定陵入汝魯陽今汝州

魯山定陵今許州舞陽

洧水出汝州魯山縣堯山東過隼縣故城北魚齒山下疑隼縣後來并入葉縣東過定陵縣西不羹亭又東入汝定陵今許州舞陽

溱水一名漕水一名澮水出滎陽澮城西北鷄絡塢下東南入洧

黃水宛陵縣西有黃水西南至新鄭城西入洧黃崖者是其水之側

洧水出滎陽密縣西馬嶺山密今隸河南其水東南有漆水入焉又過新鄭有黃水入焉又東南至長平入潁長平今陳州西華縣班云行五百里

潁水舊云出潁川陽城縣西北少室山今陽城縣省入河南登封矣東南至長平縣洧水入焉長平隋改曰西華今陳州又東南過南頓縣潁水入焉又東南至下蔡入淮下蔡今壽州治班云行千五百里

決

肥水出合肥縣鷄鳴山北流二十里許分為二其一
東流經合肥縣南又東南入巢湖其一西北流二百
里出壽春西投于淮爾雅出同歸異曰肥今謂之合
肥者以其雖二流而合於一源也應劭闕駟皆謂夏
水出城父東南與此肥合故曰合肥謬矣此唐人盧
潘云

豪

旃然水杜云出滎陽成臯縣東入汴又按酈道元云

與索水合

汴水一名鴻溝一名官度水一名通濟渠一名滎蕩渠或云滎蕩渠別汴首受河水自汜水縣東南過滎陽陳留睢陵符離至泗州入淮

洙水杜云出魯城北下合泗桑欽云出泰山蓋縣臨樂山西南至卞入泗許慎又云北入泗當以杜為確小沂

沂水舊云出蓋縣艾山今其地在泗水奉符間南流

有小沂水從東北來入焉又南過臨沂至下邳入泗
班云行六百里

泗水舊云出卞縣故城東南桃虛西北卞縣今兗州
泗水縣是說文云泗水受濟水桑欽亦云濟水至濟
陰乘氏縣分為二一水東北流為北濟一水南流為
南濟按今此水與濟已不通矣其源出泗水縣西南
流有洙水入焉又西南至方與縣荷水入焉其水出
乘氏班固亦謂之泗水方與今單州魚臺又云有鄆

水至高平湖陸入泗水又南至彭城名曰沛水有睢
水入焉又西南至下邳沂水入焉又南至楚州山陽
入淮此水今人謂之清河或云泗水出鄆州梁山泊
睢水杜云首受汴水班云首受菰蕩水疑菰蕩即汴
也自浚儀縣東經陳留梁譙沛彭城縣入泗水浚儀
近改為祥符班云行千三百六十里

鄆水杜云出東海合鄉縣西南經魯國至高平湖陸
入泗按合鄉當在鄆縣東南湖陸當在滕縣薛城之

西然樂史云鄆出沂州費縣連青山下

荷水首受濟東南入泗

淮水出唐州桐柏縣大復山東過義陽今信陽也又東過褒信汝水自西北來入焉又東過安豐決水自南來入焉又東北有窮水從北來入焉又東過下蔡潁水從西北來入焉又東過壽春有肥水從東南來入焉又東北濠水入焉又北汴水入焉酈道元云汴即蒗蕩渠也又東過鍾離又東過盱眙有汴水從北

來入焉又東至山陽通邗溝又東泗水自東北來入
焉又東至海州東海入海班云行三千二百四十里
濮水自酸棗縣傍河東北過濮陽又東至濟陰鉅野
入濟或云首受河

馬頰水

濟水從滎陽縣北又東過敖山北又東合滎瀆滎瀆
今無水又東索水入焉又東過陽武縣北又東過封
邱縣又東過酸棗縣之烏巢澤北又東過乘氏縣南

分為荷水又東北過鉅野濮水入焉又東北過壽張汶水從東北來入焉又北過須城漁山之東左合馬頰水又北過臨邑又東北過故廬城北又東北灤水入焉又東北過華不注山華水入焉又東北過蒲臺縣北又東北過鄒平時水入焉又東北過樂安故城南又東北過利縣西地里志曰利縣在濟城北五十里又東北過甲下邑河分一枝入焉又東北入于海聞今濟水多涸竭

澠水杜云出臨淄縣北經樂安博昌縣南界入時水其流急故諺云瘦馬不渡澠水

時水一名彤春秋襄三年齊晉盟于彤是也一名如水一名澧水其上源岐淺多涸竭故又名乾時從臨淄縣西北至博昌澠水入焉博昌今青州博興又西北過高苑至梁鄒縣入濟高苑舊宣化軍今隸淄州梁鄒疑淄州鄒平是

灤水出齊州歷城縣西北入于濟謂之灤口

華水出歷城縣華不住山北入于濟

淄水杜云出泰山梁父縣西入汶按梁父今隸兗州
奉符班云出萊蕪縣原山東至博昌入濟按博昌今
青州博興桑欽云出萊蕪原山東北入海按三說異
同考其形勢當以杜言為正

汶水出萊蕪縣西南經濟北至東平壽張縣入濟萊
蕪今隸兗州在州東北一云出奉符原山西北
黃水出京縣故亦謂之京水東北流入于濟

索水出京縣西南嵩渚山後齊省京入滎陽京故城
在縣東南二十里東逕大索城又北逕滎陽城東入
于濟

離水出西塞外東至枹罕入河

湟水出臨羌北東至允吾入河

晉水出晉陽縣西懸甕山晉陽宋朝改為平晉熙寧
中省入陽曲晉水過其縣南又東入汾

文

澮水出絳州翼城澮高山又西南過絳與絳水合又西過虢祈宮南又西入汾

絳水出絳縣西南入澮

汾水出太原汾陽縣北管涔山汾陽今太原治陽曲也東南過晉陽縣東晉水從縣南東流入焉又南與文水合又西南過高梁高梁今屬洪洞遂西行過臨汾又西過絳縣西四十里虢祈宮北又西過王澤有澮水從東來入焉又西至汾陰縣北西入于河汾陰

今河中榮河縣也班云汾水西南行千三百四十里
冀州寔也

涑水一名洮水出解州聞喜縣黍葭谷俗謂之華谷
西南流至蒲阪縣入河蒲阪今河中治河東縣桑欽
云涑水南過解縣東又西南注于張陽池

湛水出河內軹縣西北山軹縣唐省入河陽濟源縣
南行至絳州垣曲縣南入河

沮水出河內軹縣東南至溫入河軹唐省入濟源縣

隸河陽軹故城在懷州河內縣西北二十七里

沅水出河東垣縣界王屋山垣今為垣曲隸絳州其水東至溫縣為濟水又東南至鞏成臯間南入河

沁水一名少水出上黨故穀遠縣羊頭山南過沁水縣北又東過河內縣又東過武德縣又東南至滎陽北東入河

洹水杜云出汲郡林慮縣東北至魏郡長樂縣入清水按林慮今隸相州長樂今大名洹水是也桑欽謂

洹水出上黨洹氏縣鄴道元謂出長子謬矣按此水
今名安陽河清水即淇水也

淇水一名清水鄭元云即降水也出衛州共城縣北
山或云出林慮東至湯陰又東至黎陽入河

屯氏河

鳴犢河

濁漳水出潞州長子縣鹿谷山一云發鳩山東過壺
關又東至武安縣東合于清漳

清漳水班云出上黨沾縣大壟谷東北過磁州武安
與濁漳合而橫流故名曰衡漳又東北過洺州曲周
平恩縣又東北過冀州武邑又東北過弓高縣弓高
今為鎮隸永靜東光又東北過成平成平今為景城
鎮隸瀛州樂壽又東北過故平舒縣東入海入海者
桑欽說也班云至邑成入河行千六百八十里

易水出北新城東至文安入滹新城今隸涿州

濡水杜云出高陽縣東北至河間鄭縣入易水按高

陽順安軍治鄭莫州治正義謂高陽今無此水平地
趙燕之界無泉出者未知杜言何據然臣聞水泉古
有處今涸竭者何限杜子之言豈妄哉

滹水出靈邱縣高氏山靈邱今隸蔚州班云東至文
安入大河過郡五行九百四十里按文安今隸霸州
滹沱水班云出代郡鹵城東至文安入海過郡六行
千三百七十里按鹵城今代州繁峙縣其水東經定
州深澤縣東南即光武所度處今俗謂之危度口又

東過瀛州東城平舒開元中盧暉於此引滹沱東入淇道溉漕文安今隸霸州若是入海當在滄州界

河水自西域來其大原有三正原出崑崙山東北陬而東行一原出天竺葱嶺一原出于闐南山北行與葱嶺河合而東入于崑崙河或云張騫窮河源至葱嶺河爾故西域傳云河有兩源一出葱嶺一出于闐而沒其正原也三河合而東過蒲昌或云入蒲昌海而復東出於理不然乃東至積石山下有石門河水

渭以西南流是為中國河積石山屬鄯州禹之所道
自此始故其詳得聞焉遂過西平即鄯州又東南過
枹罕河州也有洮水從西來入焉又東過臨洮洮州
也有離水從西來入焉又東過金城允吾縣湟水從
西來入焉金城蘭州也遂轉而北過武威涼州也又
北至朔方故夏州也遂轉而東南又南過上郡白土
縣園水從西來入焉上郡綏州也又南過隰州太寧
縣壺口山又南過北屈今慈州吉鄉也而為採桑津

又南過龍門有汾水從東來入焉龍門縣今隸河中
又南過夏陽梁山之東又南過汾陰縣西邵陽縣東
又南過蒲阪縣雷首山西蒲阪今河東也有涑水從
東北來入焉又南過華陰縣潼關渭水從西來入焉
遂轉而東過河北縣今陝州平陸也又東過陝縣底
柱山山在河中水分流包山而過湍急多覆溺舟船
又東嶠水從右入焉是謂嶠津亦謂之茅津又東左
過絳州垣曲縣湛水從北來入焉又東而為孟津又

東過河陽縣南洛陽縣北又東過溫縣沮水從西北
來入焉又東右過鞏縣洛水從西南來入焉左過成
臯縣北沆水從北來入焉成臯今孟州汜水又東過
大伾山下又東汜水從南來入焉又東過滎陽縣西
北而為棘津又東過滎陽縣鴻溝出焉鴻溝一名官
度水一名蒗蕩渠今謂之汴河大禹塞滎澤開之以
引河水東南通淮泗蒗蕩渠據桑欽所說即此也而
班固又云蒗蕩渠受濟水至陳入潁未詳其實又東

北過懷州武陟沁水入焉又東過酸棗縣西濮水東
出焉或云漢文帝時河決酸棗東潰金隄發卒塞之
其水遂絕又東北而為延津又東北左過黎陽大伾
山黎陽今通利軍治也有淇水從西來入焉淇水即
降水也又東北過濮陽縣別出而為瓠子河漢武帝
時河決瓠子水注鉅野通于淮泗發卒塞之又東北
過東武陽今大名朝城也而為漯河又東北過大名
館陶縣別出而為屯氏河又東北過清河靈縣別出

而為鳴犢河靈縣隋省入博平今隸博州鳴犢至瀛
州蓆縣與屯氏河通三河今皆絕矣又北過德州平
原又東北過棣州厭次又東北過濱州渤海又東北
過青州千乘又東北過甲下邑別出一枝入濟又東
北入于海舊說禹道河至頓邱分為二渠一曰漯川
出武陽至千乘入渤海一曰北瀆出貝邱至大陸北
播為九河同為逆河入于海舊云大陸在鉅鹿北乃
故大陸縣唐改為昭慶宋開寶改為隆平近省為鎮

入趙州臨城然禹貢大陸當只是汲郡吳澤非趙州
大陸縣也漢成帝時河隄都尉許商上言古記九河
之名有徒駭胡蘓鬲津今見在成平東光鬲縣界中
自鬲津以北至徒駭其間相去二百里是九河所在
徒駭最北鬲津最南徒駭在城平胡蘓在東光鬲津
在鬲縣又知其餘六河以次推之曰大史曰馬頰曰
覆釜在東光之北成平之南曰簡曰潔曰鈎盤在東
光之南鬲縣之北今按圖志瀛州有成平故城又有

徒駭河永靜軍有東光縣東連滄州有胡蘓亭蓋因
河命名而滄州復有鬲津鉤盤大史河之名鬲縣故
城在德州與滄比境鄭氏云九河齊桓公塞之而北
瀆至王莽時亦絕故世謂王莽河今在永靜軍然臣
每疑禹之所道無二河按禹貢文東過洛汭至于大
伾北過降水至于大陸又北播為九河同為逆河入
于海又按武帝元光三年春河水徙從頓邱東南流
入渤海是為朝城之漯河然則今河之入海者入渤

海爾禹貢所謂入于海者由碣石之海碣石今在平
州北瀆者乃禹所道之河其後河犇漯川入于渤海
故瀆遂絕九河不復通蓋故瀆在北漯川在東河決
而東勢則然也恐非齊桓公所塞自河決漯川之後
北瀆遂微九河皆絕但王莽河上承北瀆下入逆河
為一河微通奈北勢高故後亦絕但由漯川爾大抵
河自西戎入塞經秦隴陝洛夾山而行故少有決徙
之患自河陽以下東至海千里平田虛壤故多奔決

無定流

瓠子河

東汜水鄭地水此則僖三十年秦軍汜南也謂之東汜杜云在中牟按此水西分濟漯東北逕濟陰入于河

南汜水鄭地水此則僖二十四年王處于汜是也謂之南汜出汝州襄城縣浮城山北流至孟州汜水縣入河汜舊音凡今音與辰已之已同蓋因傳寫之訛

後人音為文易

瀍水舊云出穀城縣潛亭北今穀城并為河南地東過洛陽至偃師縣又東入洛

澗水出河南新安縣南白石山東南入瀍

穀水出澠池縣陽穀谷東南至河南入洛

洛水出商州上洛縣冢嶺山桑欽云出謹舉山恐是上洛舊名謹舉東過熊耳山又東北過盧氏縣又東過河南縣穀水從西來入焉又東過洛陽南伊水從

西來入焉又東過偃師澠水從西來入焉又東北過鞏縣東又北入于河班云行千七十里

伊水出虢州盧氏縣熊耳山東北過陸渾伊闕至洛陽縣南北入于洛班云行四百五十里

汧水出隴州吳山西北至汧源入渭

涇水出鎮戎軍筭頭山一名都盧山一名崆峒山一名開頭山鎮戎古安定朝那縣也東南流至永興高陵縣入渭班云行千六十里

漆水出鳳翔普閏縣東或云出岐山經華原縣與沮水合南至富平縣入于渭

沮水出邠州界經華原縣北入于漆

洛水出同州蒲城縣洛水谷谷在荆山書云荆岐既旅是也其水東南流至耀州富平入渭

渭水舊云出隴西首陽縣渭首亭南鳥鼠山首陽唐省入渭源隸渭州今隸熙州在州之東其水東過隴州汧源汧水從西北來入焉又東過鳳翔郿縣斜水

從南來入焉又東過槐里縣南潞水入焉槐里今永興興平縣又東北過咸陽縣澧水入焉又東北過高陵涇水入焉又東北過富平縣漆水入焉又東洛水入焉又東過臨潼縣灞水入焉又東至船司空縣入河船司空後省入華陰今隸華州班云渭水行千八百七十里

灞水出永興藍田縣終南山金谷東經臨潼縣北流入渭然長安志云灞水從上洛界入漢

澧水出永興藍田谷北入于灊

澧水出永興鄠縣終南山豐谷北至咸陽入渭

鎬水出鄠縣界至長安入清渠

斜

洮水出臨洮西羌中北至枹罕東入河

歷代封畛

臣謹按杜佑之序曰昔黃帝方制天下立為萬國易稱
首出庶物萬國咸寧及少皞氏之衰其後制度無聞矣

若顓帝之所建帝嚳受之創制九州統領萬國

雍荆豫梁冀青

徐兗揚

至堯遭洪水而天下分絕使禹平水土還為九州

如舊制也舜攝帝位分為十二州

雍荆豫梁冀幽并青營徐兗揚

故虞

書云肇十有二州是也夏氏革命又為九州塗山之會

亦云萬國四百年間遞相兼并商湯受命其能存者二

千餘國亦為九州分統天下

冀荆豫雍揚兗徐幽營營則禹貢青州也

載祀

六百及乎周初尚有千八百國而分天下為九畿方千

里曰王畿其外曰侯畿

亦曰服

又外曰甸畿又外曰男畿

又外曰采畿又外曰衛畿又外曰蠻畿又外曰夷畿要

服也又外曰鎮畿又外曰藩畿藩服也

侯甸男采衛蠻夷鎮藩即九畿

也各相去五百里為限

至成王時亦曰九州屬職方氏

揚荊豫青兗雍幽冀

并其後諸侯相并有千二百國及平王東遷迄于獲麟之末二百四十有二年諸侯擅兵征伐更相吞滅不可

勝數而見於春秋經傳者百有七十國爾

百三十九國知土地所在

其三十一國不知其處也

其蠻夷諸國復不在其數逮乎下分地里

上配天象而所定躔次總標為一十二馬及周之末唯

有七國

秦昭王時西周盡獻其地邑三十六口三萬受獻而歸其人至莊襄王滅東西周國七城而已

秦制天下為四十郡其地則西臨洮而北沙漠東紫南

帶皆臨大海漢興以秦地太大更加置郡國其後開越

攘胡土宇彌廣改雍曰涼梁曰益又置徐州復禹舊號

置交

初為交趾後為交州

北有朔方

初為朔方後為并州

凡為十三州部刺

史

司隸并荆兗豫揚冀幽青徐益交涼

而不常所治至哀平之際凡新置

郡國六十三與秦四十合百三縣邑千三百一十四道

三十二侯國二百四十一地東西九千三百二里南北

萬三千三百六十八里此漢之極盛也後漢光武以官

多役煩乃併省郡國十縣道侯四百餘所其後亦為十

三州部司隸治河南

今河南府

豫治譙

今鄆縣

兗治昌邑

今魯郡金

鄉徐治郟

郟音談今臨淮郡下邳縣

青治臨淄

今北海郡縣

涼治隴

今天水郡

隴城縣

并治晉陽

今太原府

冀治鄆

許各反今趙郡高邑縣

幽治薊

今范陽縣

揚治歷陽

今郡縣

益治雒

今永昌郡

荆治漢壽

今武陵郡武陵縣

交治

廣信

今蒼梧郡蒼梧縣

漸復加置郡國至於靈獻凡百有五焉

縣道侯國千一百八十

桓帝永興初有卿三千六百八十二亭萬二千四百二十

東

樂浪郡西敦煌郡南日南郡北鴈門郡西南永昌郡四

履之盛亦如前漢魏氏據中原有州十二司隸荊豫兗

青徐涼秦冀幽并揚雍

分涼州置秦州治上邦今天水郡揚治壽春今郡徐治彭城今

郡荆治襄陽今郡宛治武威今郡餘並因前代

有郡國六十八東自廣陵

文帝黃初

六年親征幸廣陵故城及旋師留張遼屯江都齊王嘉平後屬吳即今郡

壽春

母邱儉諸葛誕皆鎮之

合肥

明帝青龍元年滿寵於合肥西北三十里築新城吳軍頻攻不拔即今廬江郡故魏明帝云先帝東

置合肥南守襄陽西固祈山賊來輒破於三城之下者地有所必爭是也

沔口

建安十五年文聘為江夏

太守鎮焉其後吳軍頻攻不拔青龍後屬吳即今漢陽郡

西陽

黃初中滿寵令將守之今齊安郡

襄

陽

建安二十四年徐晃守之蜀將關羽攻不下

重兵以備吳

是時江淮間除鎮兵之處更無

人居明帝青龍中吳孫權遣數千家佃於江北為滿寵破之

西自隴西

今郡

南安

今隴

西郡隴西縣齊王嘉平五年蜀將姜維來伐攻隴西南安皆不剋

祈山

明帝太和二年蜀將諸葛亮攻

祈山城不拔今同谷郡長道縣東十里

漢陽

明帝青龍二年蜀將諸葛亮來伐遣兵備此即今天水郡

陳倉

建安二十四年蜀將破夏侯妙才於漢中遂令張郃守陳倉太和二年諸葛亮以大衆攻之將軍郝

昭以千人守亮攻二旬餘不拔故城今在縣東二十里亮攻郃又不剋郃故城在今縣東北十五里並今扶風

郃

重兵以備蜀蜀全制巴蜀置益

治成都

梁

治漢中

二

州有郡二十二以漢中

建安末破夏侯妙才遂有漢中以魏延鎮此後蔣琬姜維繼守

即今郡地 **興勢** 後主延熙七年將軍王平守之魏大 **白帝** 先

章武元年屯之遂為重鎮後主建興十 **並為重鎮** 吳主

五年吳將全琮來攻不剋即今雲安郡 **北據江南盡海置交** 治龍編今 **廣** 孫權置治番 **荆** 治南

江陵 **郢** 治江夏 **揚** 治建業今丹 **五州有郡四十有三以**

建平 自孫權黃武初破蜀先主後得之孫皓天紀四年

郡 **西陵** 建安二十四年蜀將關羽北討魏將于禁等于

遜大破之後步闡陸抗 **樂鄉** 吳孫皓建衡三年陸抗所

並鎮焉即今夷陵郡 築樂鄉城後朱然脩之戌

馬晉王濬攻樂鄉獲水軍督陸景平西將 **南郡** 自建安

軍施洪以城降在今江陵郡松滋縣東 末剋關

羽後蜀將麋芳來降遂得之孫皓鳳皇元年督將伍延
守此晉軍平吳當陽侯杜元凱赴之斬伍延即今江陵

郡也 **巴邱** 建安十九年魯肅剋之孫皓寶鼎 **夏口** 建安十
元年萬彥並鎮守即今巴陵郡

權征黃祖剋之後遂置兵鎮孫皓天紀元年孫慎
守之及晉平吳將軍胡奮赴於此即今江夏郡 **武昌**

孫權甘露元年城武昌陸遜諸葛恪鎮守及 **皖城** 建安
晉平吳將軍王戎赴於此即今江夏郡是

年孫權剋之赤烏四年諸葛 **牛渚圻** 孫皓天紀末何植
恪屯此今同安郡皖音患鎮守晉平吳大將

王渾赴於此即今宣 **濡須塢** 建安十七年蔡後曹公頻
城郡當塗縣採石也來攻不剋在今歷陽縣西

南百八 **並為重鎮其後得沔口** 孫權嘉禾後陸 **邾城** 赤
十里遜諸葛瑾屯守

四年陸遜常以三萬兵戍之今齊安 **廣陵** 孫亮建興三
郡東西界臨江與江夏郡武昌相對年衛尉馮朝

城廣陵

自三國鼎立更相侵伐互有勝負疆境之守彼此

不常纔得遽失則不暇存也今畧紀其久經屯鎮及要

害之地焉

其守將亦畧紀其知名者餘不可偏舉他亦類此

晉武帝太康元年

平吳分為十九州部置司州治洛陽

今河南府

兗治廩丘

今濮

陽郡雷澤縣是

豫治項

今淮陽郡項城是

冀治房子

今趙郡縣

并治晉陽青

治臨淄徐治彭城荆初治襄陽後治江陵

今揚

初治壽

春後治建業涼治武威分三輔為雍治京兆

今府

分隴山

之西為秦治上邽

今天水郡縣

益治成都分巴漢之地為梁

治南鄭

今漢中郡縣

分雲南為寧治雲南

今郡

幽治涿

今范陽郡

縣

分遼東為平治昌黎

今安東府

交治龍編

今安南府

分合浦之

北為廣治番禺又增置郡國二十有二凡州百五十有

六縣千一百有九以為冠帶之國盡秦漢之土及永嘉

南渡境宇殊狹九州之地有其二焉初元帝命祖逖鎮

雍邱

建武初逖北伐便屯雍邱今陳留郡縣

逖死北境漸蹙

大興四年逖死

於是

荆豫

自淮北今汝南汝陰南陽等郡以北

青兗四州

今東萊東牟高密北海淄川濟南等郡之

地及徐州之半

今彭城琅邪等郡

陷劉曜石勒以合肥

戴若思鎮守之

淮陰

劉隗鎮守即今山陽郡縣

壽陽

祖約鎮守後又陷於石勒石虎死後復之即今壽春郡地

泗

口

劉遐鎮守即今臨淮郡宿遷縣界

角城

安帝義熙中置亦在宿遷縣界

為重鎮成帝

時鄧守將退屯襄陽

咸和初魏該屯鄧為劉曜將黃秀所逼而退守襄陽後亦陷石勒尋

復之庾翼朱序皆鎮於此又為苻堅將苻丕所陷尋又復之即今郡

穆帝時平蜀漢

永和三年

桓溫西討擒李勢

復梁益之地

梁州則漢川益則蜀川是

又遣軍西入關至

灞上

十年桓溫討苻健於今京兆府萬年縣白鹿原戰敗

再北伐一至洛陽

永和十二年

年桓溫討燕慕容皝大破其將姚襄於伊水時襄已降

一至枋頭

廢帝太和三年桓溫又討慕容

暉敗還今汲郡衛縣界枋音方

所得郡縣軍旋又失洎苻堅東平慕容

暉

太和五年

西南陷蜀漢西北剋姑臧

孝武太和五年平張天錫今武威郡

則

漢水長淮以北悉為堅有及堅敗

太和八年

再復梁

九年將郭寶平

梁益

蜀郡太守任權斬苻堅益州刺史李平益州平

青徐兗豫司之地其後青

兗陷於慕容德

安帝隆安三年德據之殺幽州刺史辟閭渾時鎮廣固即今北海郡也

豫

司陷於姚興

隆安三年

以彭城為北境藩扞

朱序鎮守

後益梁陷

於譙縱

義熙初陷

每因劉石苻姚衰亂之際則進兵屯戍在

於漢中襄陽彭城然大抵上明

今江陵郡松滋縣

江陵夏口武

昌合肥壽陽淮陰常為晉氏鎮守

其刺史所治皆置州兵雖有不經攻圍互

是重鎮他
皆類此

義熙以後又復青兗司豫梁益之地而政移

於宋矣武帝北平廣固

時晉安帝義熙六年平慕容超得青州之地廣固即今北海

西定梁益

九年朱齡石平譙縱

又刻長安

十三年親征平姚泓

盡得河南之

地長安尋為赫連勃勃所陷至廢帝榮陽王景平中武

牢以西復陷後魏今大較以孝武大明為正凡二十有

二州揚治建業南徐治京口

今丹陽郡丹徒縣

徐治彭城南兗

治廣陵兗治瑕

今魯郡縣

南豫治歷陽荆治汝南

今汝南郡汝陽縣

江治尋陽

今郡縣

青治臨淄

初治歷城今濟南郡縣後治廣固後又移治臨淄即今縣

是冀治歷城司治義陽荆治南郡郢治江夏今湘治臨

湘今長沙郡雍治襄陽今郡梁治南鄭秦亦治南鄭益治成都

今蜀郡寧治建寧今雲南郡廣治南海交治龍編越治臨鄣今合

浦郡自東晉成帝時中原流民多南渡遂於江漢淮之間僑立州郡以撫其民中間併省廢置離合非一不能詳制焉今紀其所治郡凡二百三十有八縣千一百七經久者他皆類此

十有九初文帝元嘉中遣將北伐水軍入河剋魏碣磔

滑臺虎牢洛陽四城碣磔即今濟陽郡城滑臺今靈昌郡城虎牢今汜水縣洛陽今故洛

陽城碣磔音口其後又失又分軍北伐西軍剋弘農開方

二城

並今弘農郡

以東攻滑臺不剋而平礪礪守之尋皆敗

退

元嘉二十七年王元謨於滑臺敗歸時柳元景拔弘農開方及元謨敗亦棄而遁

於是後魏

主太武總師經彭城臨江屯於瓜步

今廣陵郡六合縣東

退攻盱

眙不拔而旋

臧質守之魏師攻圍三旬不拔今淮陽郡縣

明帝時後魏又南

侵淮北青冀徐兗四州及豫州西境悉陷沒

秦始二年徐州刺史

薛安都引魏軍自是沈文秀東陽城崔道固歷城並為魏將慕容白曜所陷安都以彭城常珍奇以懸瓠並降

魏懸瓠今汝南郡城

則長淮為北境僑徐兗於淮南

淮陰立兗州鍾離立徐州

立青冀二州寄治贛榆

今東海郡東海縣贛古淡反

其後十年餘而

宋亡然初彊盛也南鄭襄陽懸瓠

元嘉二十六年後魏主太武率兵攻圍汝

南太守陳憲等距四十餘日魏人積屍與城齊不拔而退

彭城歷城東陽

梁陽王景平初竺葵

鎮守後魏攻圍數旬不剋即今北海郡治東城

皆為宋氏藩扞齊氏淮北之地

所以全少青州治朐山

今東海郡朐音衛

冀治渦口

今臨淮郡連水縣

豫治壽春

北豫州自東晉以後或治淮南或治淮北不常其所今舉其要害之地

北兗治

淮陰北徐治鍾離又置巴東治巴

今雲南郡

其餘州郡悉因

宋代州二十有三郡三百九十有五縣千四百七十有

四其後頻為後魏所侵至東昏永元初沔北諸郡相繼

敗沒

今南陽郡地

又遣軍北伐敗於馬圈退屯盆城

魏馬圈城去襄

陽三百里時陳顯達攻圍四十餘日不拔魏援師至敗還在今丹陽郡界

又失壽春

永元二年豫州

刺史裴叔業以城叛入魏

後三年齊亡

齊氏七主凡二十四年內難繁興不遑外畧及東昏暴虐

北境彌蹙

始全盛也南鄭

明帝建武二年後魏大將元英來伐梁州刺史蕭懿守拒攻圍百餘

日不下

樊城

今襄陽郡安養縣建武中後魏主孝文率兵十萬數旬攻圍將曹虎拒守不下

襄陽

義陽壽春

高帝遣垣崇祖鎮之謂曰兵衝要地宜備魏師俄而魏將王肅以大軍來攻敗而歸

淮

陽角城

明帝初後魏南侵以李安仁戍之

漣口朐山為重鎮梁氏州郡

多沿舊制天監中州二十有三郡三百五十縣千二十

有五其後更有析置大同中州百有七郡縣亦稱於此

自侯景逆亂建康傾陷墳籍散逸不可得而詳焉初武

帝受禪數年即失漢川及淮西之地

天監三年梁州刺史夏侯道遷以本

部叛降後魏自劍閣以北並陷沒又魏將元英破將軍馬仙琕於義陽失地

其後諸將頻年

與魏軍交戰於淮南淮北互有勝負

自天監四年以後將張惠紹剋魏宿

遷城韋叡剋合肥裴邃剋翟邱城朐山城尋皆敗唯合肥獨存

雖得懸瓠彭城俄而又

失

天監六年魏軍主白早生豫州刺史胡遜以懸瓠普通六年徐州刺史元法興以彭城並內屬無何悉復

於魏又剋壽春

普通七年將夏侯元植等剋之獲魏揚州刺史李憲自齊東昏永元二年陷後魏

之

通志

三

至是凡二十七
年南朝始復

大通初大舉北伐城鎮相次剋平直至

洛陽暨為梁有

大通元年魏將爾朱榮害胡太后及少主魏朝大亂遣將陳慶之率軍送元顥

為魏主入河陽六旬五日渡河守北中府城數日爾朱榮來攻數日顥敗慶之亦奔退所得之地尋亦失之中府地即今河

其後又復漢中

大同中將蘭欽剋之自天監二年失漢川凡經四十

三年却復

至東魏將侯景以河南地降逆亂相尋有名無實

及景平後江北之地悉陷高齊漢川蜀川沒于西魏

太清

初侯景以十三州來降旋為東魏將慕容紹宗所敗二年景舉兵反圍建康陷之及景平後元帝承聖初齊將辛術南伐盡取淮南江北之地得傳國璽反於齊三年西魏將達奚武陷漢川尉遲迥陷蜀川其漢川經九年

復大抵雍州今襄陽縣東南下澁音愜戍漢東郡棗陽縣東南夏口白苟堆同大

中東魏靜帝遣將堯雄為南境守將雄曰白苟堆梁之北面重鎮請備之在今汝南郡真陽縣硤石城

今汝陰郡下蔡縣合州即合鍾離將康綸鎮守之淮陰朐山為重鎮天監

三年角城戍主柴慶宗以角城十一年東莞太守劉晰以朐山並降入魏陳氏比於梁代土

宇彌威西不得蜀漢北失淮肥以長江為境文帝天嘉初湘川之

地為周軍所陷二年侯瑱剋平之湘川有州四十有二

今澧陽武陵長沙衡陽等郡之地也地轉狹而州益多暨後州郡又數倍多於前代故不可詳郡百有九縣四百三十有

八宣帝大建中頻年北伐諸將累捷盡復淮南之地將吳

明徹於壽春城
斬高齊將王琳

更經畧淮北大破齊軍於呂梁及旋師

屬高齊國亡又總軍北伐至呂梁周軍來拒又大破之

自大建五年北伐七年破齊軍九年又破周
將梁士彥悉得梁淮北地以兵鎮下邳朐山旋為周軍

所敗悉虜其衆

時梁士彥守彭城明徹來攻未下十年
周將王軌來伐明徹退師全軍沒於清

自是江北之地盡沒於周又以長江為界

十二年周
大將司馬

消難以淮西地來降又遣將
周羅侯攻剋新野尋並失之

及隋軍來伐遣將守狼尾

灘

後主禎明三年戚昕守
之今夷陵郡宜都縣界

荊門

將仲肅據之
亦宜都界

安蜀城

將顧

覺鎮之亦
夷陵郡

公安

將陳紀鎮之
今江陵郡縣

巴陵已下並風靡退散

信州

道大總管清河公楊素自峽中舟師東下
東方守將相繼而破信州即今雲安郡也
隋軍自採石

隋將韓擒虎襲陷之
京口
賀若弼襲陷之
渡江而平之後魏起自北方至

道武率兵下山東攻拔慕容寶中山
今博陵郡唐昌縣
遂有河

北之地於是遷都平城
今雲中郡
慕容氏喪敗遣將南畧地

至于滑臺許昌
今潁川郡
彭城明元帝太恒中始於滑臺許

昌置兵鎮守
道武天興中長孫肥等剋滑臺許昌尋不能守至是始有之
太武帝時

又得蒲阪
今河東郡
長安統萬
始光中遣軍伐赫連昌剋蒲阪及長安又剋統萬遂滅赫

連氏統萬即赫連所都今朔方郡是
神麋中宋師來伐礪礪
今濟陽郡城
滑臺

虎牢

今河南府汜水縣是

成將皆不守尋並復之

神龜三年宋將到彦之王仲德

等陷滑臺虎牢洛陽遣安頡叔孫建等擊敗走之

太延以後東平遼東西平姑

臧

三年東伐馮氏五年西伐沮渠並滅之

於是西至流沙東接高麗所未

得者漢中及南陽懸瓠彭城青州之南而已其後帝自

南征遂臨瓜步宋淮北城鎮守將多有敗沒

太平真君十二年因

宋將王元謨來侵剋礪礪城戍將濟州刺史王買得棄城而走宋師至滑臺敗帝乘勝至江上

獻文天

安初自河之南長淮之北皆為魏有

時因宋晉安王子勳之亂遣將慕容

白曜畧地破宋將沈文秀畢眾敬薛安都崔道固常珍等遂有其地

孝文遷都洛陽

太和十九

年徙都

頻歲親征皆渡淮沔

二十年屯八公山三十一年屯新野及樊城

宣武

初又得壽春

景明初齊將裴叔業以壽春來降後至明帝孝昌二年又陷入梁

續收漢

川至于劔閣兼得淮西之地

正始初梁將夏侯道遷以漢中降又元英破梁將馬

仙琚於義陽遂有其地

莊帝時梁軍洛陽數旬敗走

永安初因爾朱榮害胡太

后少帝之亂梁將陳慶之送元顥為魏主

爾後內難相繼不暇外畧三四年

後分為東西魏矣皆權臣擅命

詳周齊事中

自永安末年爾

朱世隆稱兵入洛圖籍散亡不可詳紀今按舊史云管

州百十有一郡五百十有九縣千三百五十有二

按魏收史

所載州郡見東魏靜帝武定中其時洛陽以西及關中梁益之地悉屬西魏收猶總而編之

自太武

以後漸更強盛東征西伐剋定中原屬宋明以後及於

齊梁國土漸蹙自守不暇雖時有侵掠而退不旋踵故

魏之城鎮少被攻圍因利進取不常所守也北齊神武

東魏天平末大舉西伐至蒲津

靜帝天平四年三道伐西魏齊神武自總大衆

至蒲津寶泰自風陵濟河至潼關高敖曹入武關陷上洛以秦軍敗沒並旋師風陵在潼關北岸相對西

魏乘勝攻陷陝州

周文帝率李弼等東征下陝州禽刺史李祥伯即今陝郡

神武西

至沙苑

其年冬大敗而歸今馮翊郡界

西軍又乘勝襲陷洛陽

西魏將獨孤如

願據金墉

明年西師又至於河陰

今洛陽縣北

時拒守河陽城

潘相

樂守北城即舊城高永樂守南城即今城後周文帝親征不剋

西師敗歸

大象元年周文帝親征敗

還如願亦棄金墉遁走神武遂毀其城

其後神武攻圍西魏玉壁不剋

興元

四年西魏將王思政守之今絳郡稷山縣

西師來伐至於邛山

武定初周文帝親征神武

禦之敗殺周將王雄

後神武又圍玉壁不剋

武定四年西魏將韋孝寬守之

文襄

遣將圍潁川拔之

自武定五年冬攻圍至明年六月城陷

於是河南自洛

陽之西河北自晉之西

今平陽郡

悉入西魏文宣之世命將

畧地南際于江矣

天保二年屬侯景亂梁遣辛術南討遂得傳國璽又過江得梁夏口後二

國通和旋師矣

武成河清中築戍於軹關

河清二年遣斛律光築之今河南府濟源

界

其年周軍至洛陽敗還

晉公護統軍將楊綱等至軹關敗走

後主武平

中陳軍來侵盡失淮南之地

武平五年以後陳將吳明徹頻歲來侵淮南城鎮皆

不守諸將累敗

周師攻拔河陰大城

周武親征有疾班師

後主隆化末西

師攻拔晉州

今平陽郡

因之國滅

齊都於鄴即今郡縣

自東魏之後天

下三分梁陳有江東宇文有關西高氏據河北有州九

十有七郡百六十縣三百六十有五

文宣天保七年已併省州三郡百五

十三縣五百八十九鎮二戌二十六

當齊神武之時與周文帝抗敵十三

四年間凡四出師大舉西伐周師東討者三焉

畧舉齊神武周

文帝統師親征諸將攻戰則不復紀

自文宣之後纔守境而已大抵西則

姚襄城

今文城郡西城姚襄所築西臨黃河控帶龍門之險周齊交爭之地後主武平二年大將斛律

光破周兵於此遂立鎮焉

洪洞

今平陽郡縣北故城控據要險崇化末周師既剋晉州其城主張元靜以

城降

晉州武平關

三關並今絳都正平縣界

柏崖

城侯景所築今河清縣西

軹關

河陽南則虎牢

陸子章增築城守

洛陽北荆門

今陸渾縣東北故城是

孔

城防

今伊闕縣東南故城是

汝南郡

今臨汝郡梁縣南

魯城

今汝南郡魯山縣東北

置兵以防周寇

自洛陽之南襄城汝陰汝南以北皆齊有

及陳師侵軼數歲

齊亡南境要害未遑制置也周文帝西魏大統中東魏

師至蒲津

文帝大統二年齊神武親征至蒲津以竇泰死退軍

文帝東征剋陝州

兼得宜陽郡邵郡

邵郡今絳郡常縣宜陽郡今福昌郡

東師又至沙苑

其年

冬齊神武親征大敗走

後文帝東征至河陰先勝後敗

大統四年殺魏將高

教曹也

築城於玉壁

大統八年將王思政築之齊神武攻圍不剋至十二年韋孝寬守之齊神

武又攻圍六旬不剋

文帝又至邛山先勝後敗

大統九年

得梁雍州

十六

年梁雍州刺史岳陽王譽舉州內附

廢帝初剋平漢中

自梁侯景逆亂遣將達奚武剋之

又遣軍平蜀

將尉遲迴剋之

文帝西征至姑臧後又平江陵

齊王

廓後元初于謹
平之殺梁元帝

自是疆理西有姑臧西南有全蜀南至

于江矣

明帝武成二年將賀若敦剋陳湘州之地
三年失之今澧陽武陵長沙衡陽等地是

其河

南自洛陽之東之北河東自平陽之界屬于高齊至武

帝建德中東征拔齊晉州城尋又東征破齊師於晉州

城下

建德五年攻拔晉州使梁士彥守之齊後
主來攻三旬餘不拔六年又破齊後主軍

乘勝平

齊後遣軍破陳軍於呂梁

將王軌破陳將吳
明徹悉虜其衆也

其東南之

境盡于長沙通計州二百十有一郡五百八縣千二十

有四當全盛戰爭之際則玉壁

初王思政守後韋孝寬
守東軍攻不拔遂置勲

州邵郡齊子嶺

今王屋縣東二十里周齊分界處

通洛防

故函關城武帝保定中改

名今在新安縣東

黃櫨三城

今永寧縣西北

宜陽郡陝州土剗

今長水郡西北

二十里

三荆

將獨孤信畧定北荆州今即伊陽縣東荆

三

鵠鎮

今汝州魯山縣西南名平高城

置兵以備東軍隋文帝開皇三年

遷都大興城

即今城

遂廢諸郡以州治民

自三代以前為九州兩漢加置

十三州晋宋之後分析漸多至于魏齊後周雖割據鼎立天下分裂其於州郡乃倍兩漢之地隋氏以官繁民弊遂廢五百餘郡而以州治民名則因循職事同於郡守無復刺舉之任

自九載廓定江表

尋以戶口滋多析置州縣煬帝大業初移洛陽城

即今城

又征林邑更置三州既而併省諸州三年改州為郡乃

置司隸刺史分部巡察

本史不分別所置諸郡

五年平定吐谷渾

更置四部大凡郡百九十縣千二百五十五東西九千

三百里南北萬四千八百一十五里東南皆至于海西

至且末

隋氏西境唯得今燉煌郡以東且子余反

北至五原

即今九原郡按隋氏北境唯至

于河隋氏之盛蓋極於此矣及唐高祖武德初又改郡為

州太守為刺史其邊鎮及襟帶之地置總管府以領軍

戎至七年改總管府為都督府自因隋季分割州府倍

多前代貞觀初并省州縣始於山河形便分為十道一
曰關內道二曰河南道三曰河東道四曰河北道五曰
山南道六曰隴右道七曰淮南道八曰江西道九曰劍
南道十曰嶺南道既北殄突厥頡利西平高昌東西九
千五百十里南北萬六千九百十八里高宗平高麗百
濟得海東數千餘里旋為新羅靺鞨所侵失之又開四
鎮即西境拓數千里至于開疎勒龜茲焉耆諸國矣景
雲二年又分置二十四都督府分統諸州時議以權重

不便尋罷之開元二十一年分為十五道置採訪使以

檢察非法京畿

治西京城內

都畿

治東郡

關內

多以京官遙領

河南

治陳

留

河東

治河東郡

河北

治魏郡

隴右

治西平郡

山南東

治襄陽郡

山南西

治

治漢中郡

劔南

治蜀郡

淮南

治廣陵郡

江南東

治吳郡

江南西

治豫章郡

黔

中

治黔中郡

嶺南

治南海郡

又於邊境置節度

經略使式遏四夷

節度使十經略守捉使三

大凡鎮兵四十九萬人戎馬八萬餘匹每

歲經費衣賜則千二十萬正段軍倉則百九十萬石大

凡千二百十萬

開元天寶每歲邊用不過二百萬

其地東至安東都護

府西至安西都護府南至日南郡北至單于都護府南

北如前漢之盛東則不及西則過之

漢之東境有樂浪郡西境有燉煌郡

今東極安東府則漢遼東郡也其漢之元菟樂浪二郡並在遼東郡之東今悉為東夷之地矣今西極安西府其伊吾交河北庭安西則漢代戎胡所據皆未得而詳九州之區域在昔顓帝及

于陶唐分而為九其制最大

顓帝置九州堯時洪水使禹治水還為九州舜分為

十二州夏商並為九州按周之本制起於顓帝辨其疆界始於禹貢今分別地里故以為首

雍州西

據黑水東距西河

黑水今張掖郡西河則龍門之河今京兆華陰馮翊扶風汧陽新平安定

彭原安化平涼靈武五原寧朔洛交中郿延安咸寧上郡銀川新秦朔方九原榆林安北天水隴西金城會寧

安鄉臨洮和政寧塞西平武威
張掖酒泉晉昌燉煌等郡也
豫州西南至荆山北距

河荆山在今襄陽郡南其北境至于河今河南府陝郡
之南境弘農臨汝滎陽陳留睢陽濟陰譙郡潁川淮

陽汝陰汝南淮安襄
陽武當漢東等郡也
冀州唐虞之都以餘州所至則是

其境

西境雍州南境豫州東境兗州皆以河為界河自
今文城絳郡西龍門南流至華陰東過今汲郡黎

陽縣東大岯山又東入于海今河內汲郡鄆都廣平鉅
鹿信都趙郡常山博陵河間文安饒陽上谷范陽順義

歸化歸德媽川漁陽密雲北平柳城河東絳郡陝郡之
北境平陽高平上黨樂平陽城大寧文城西河太原昌

化樓煩鴈門定襄安邊
馬邑雲中單于等郡地
兗州舊為濟河之間
孔安國云
東南據濟

西北距河今靈昌濮陽濟陽東郡清河魏
郡博平東平平原樂安景城等郡地是也
青州東北據

海西距岱

岱泰山也今在魯郡界自泰山之東至于海今北海濟南淄川東萊東牟高密安東等郡

是徐州東據海北至岱南及淮

自泰山之南淮之北海之西也今彭城臨淮魯

郡東海琅邪等郡地是也

梁州東據華山之陽西距黑水

華山之陽今華陰之

西南黑水出張掖郡南流北海即巴蜀之地皆是也今上洛漢中洋川安康房陵通川潯山南平涪陵南川瀘

川清化始寧成安苻陽巴川南賓南浦閬中南充安岳

盛山雲安捷為陽安仁壽通義和義資陽南溪河池武都同谷順政懷道同昌陰平江油交川合川蓋昌普安

巴西梓潼遂寧蜀郡德陽濛陽唐安臨邛廬山通化越

源等郡地揚州北據淮南距海

北自淮之南東南距于海閩中以北地今

廣陵淮陰鍾離壽春永陽歷陽廬江同安蘄春弋陽宣城丹陽晉陵吳郡餘杭新定新安會稽餘姚臨海縉雲

永嘉東陽信安鄞陽尋陽之東境豫章臨川廬陵宜春
南康建安長樂清源漳浦臨汀潮陽郡地自晉以後歷
代史皆云五嶺之南至于海並是禹貢揚州之地按禹
貢物產貢賦職方山藪川浸皆不及五嶺之外又按荆
州南境至衡山之陽若五嶺之南在九州封域則以隣
接宜屬荊州豈有捨荆而屬揚斯不然矣此則近史之
誤然則嶺南之

地非九州之境

荊州北據荆山南及衡山之陽

荆山在今襄陽

郡界南至今衡陽郡桂嶺之北皆是也今江陵夷陵巴
東景陵富水安陸齊安漢陽江夏義陽尋陽之西境長
沙巴陵衡陽零陵江華桂陽連山邵陽武陵澧陽黔中
寧夷涪川廬溪廬陽靈溪潭陽清江播川義泉夜郎龍
溪等

郡地

其雍州西境流沙之西荊州南境五嶺之南所置

郡縣並非九州封域之內也凡郡之土宇秦氏分制罷

侯置守列為四十其境可知內史

雍州之域今京兆華陰馮翊扶風汧陽新

平及梁州之域上雍郡地皆是

北地

雍州之域今平涼靈武五原寧朔等郡地

隴西

雍州之域今天水隴西會寧安鄉和政及梁州之域

河池

郡地皆是

上郡

雍州之域今洛交中部延安咸

寧上郡銀川新秦朔方等郡皆是

九原

雍州之域今九原安北皆是

三川

荆河之域今河南府

陝郡之河南地弘農臨汝滎陽陳留及冀州之域

河內

郡地是也

碭郡

豫州之域今睢陽譙郡濟陰及

兗州之域東平郡地是也

潁川

豫州之域今潁川淮陽汝南等郡地是也

南陽

豫州之域今南陽淮

安漢東武當及荆州之域義陽郡地是也

邯鄲

冀州之域今廣平鄴信都之西南境鉅鹿之南境

上

谷

冀州之域今上谷范陽文安河間媯川順義歸化歸德博陵之東境饒陽之北境及兗州之域景城之北

境皆是也鉅鹿冀州之域今常山趙郡之東北境博陵之西

清河景城境鉅鹿之北境饒陽之南境漁陽冀州之域今漁陽之域今

境之南境是遼西冀州之域今柳城及遼東青州之域今河東冀州

之域今河東絳郡陝郡之北上黨冀州之域今上黨高

境平陽大寧文城等郡是也

太原冀州之域今太原西河昌化定代郡冀州之域今

北境是也鴈門冀州之域今為鴈門郡之雲中冀州之域今

及雍州之域東郡平冀州之域今靈昌濮陽濟陽魏郡博

齊郡兖州之域今平原樂安及青州之薛郡徐州之域

海郡琅邪青州之域今高密及徐州之域今彭

漢中

梁州之域今漢中洋川巴郡梁州之域今通川

安房陵郡地皆是也巴郡梁州之域今通川

川清化始寧咸安符陽巴川南賓南浦閬

中南宛盛山雲安及安岳郡之東境皆是

蜀郡

梁州之域今巴

蜀郡

梁州之域今巴

蜀郡

梁州之域今巴

蜀郡

梁州之域今巴

蜀郡

西普安梓潼遂寧益昌蜀郡德會稽楊州之域今晉陵

陽濛陽唐安臨邛廬山郡地是會稽吳郡餘杭會稽餘

姚東陽信安縉雲臨海永嘉及丹關中楊州之域今建

陽之東境兼吳興郡之東境地是關中安長樂清源漳

浦臨汀郡南郡荊州之域今江陵清江巴東景陵富水

地皆是也南郡荊州之域今長沙巴陵衡陽零

郡地

長沙

荊州之域今長沙巴陵衡陽零

長沙

荊州之域今長沙巴陵衡陽零

長沙

荊州之域今長沙巴陵衡陽零

長沙

荊州之域今長沙巴陵衡陽零

長沙

荊州之域今長沙巴陵衡陽零

陵澧陽黔中寧夷盧陽南海南越之域今南海始興義

靈溪潭陽郡地皆是也南海南越之域今南海始興義

要感義晉康臨封開陽高涼連城新興桂林南越之域今始安平

銅陵懷德揚州之域今潮陽郡皆是也

樂蒙山開江蒼梧潯江鬱林平琴安城賀水桂林象郡

龍城融水朗寧懷澤寧仁合浦橫山循德龍池永定郡

地皆是也象郡南越之域今招義南潘普寧陵水南昌定川

是也寧越安南武義龍水忻城九真福祿文陽日

南承化玉山合浦安樂其餘郡府自漢已後歷代開拓

海康溫水湯泉郡皆是

四夷之地今隴右道武威張掖西平寧塞酒泉晉昌敦

煌伊吾交河北庭安西武都臨洮懷道合川

山南西道順政劔南道犍為陽安安岳之西境仁壽通

義和義資陽南溪同昌陰平油江文川道化臨翼江源

歸城靜川蓬山恭化雞川雲山越雋雲南洪源黔中道

涪川播川夜郎義泉漆溪嶺南道臨潭扶南正平樂古

朱崖昌化延德瓊爰自漢代至于有隋或郡國參置或

山萬安郡地皆是

年代短促州郡無常增省而離合不一疆理難詳

開元十道圖

臣謹按唐開元十道圖其山川之所分貢賦之所出得禹貢別州任土之制遠不畔古近不違今載之六典為可書也

一曰關內道古雍州之境今京兆華同岐邠隴涇寧坊

鄜丹延慶鹽原會靈夏豐勝綏銀凡二十有二州焉

其原

慶靈夏延又管諸蕃
落降者為羈縻州

東拒河西抵隴坂南據終南之山

北邊沙漠

河歷銀綏延丹同華六州之界隴坂在隴州之西終南山在京兆之南沙漠在豐勝二州

之北

其名山有太白九峻吳山岐山梁山秦華之嶽在焉

太白在京兆武功縣九峻在奉天縣吳山在隴州岐山在岐州梁山在同州韓城縣華岳在華州

其大

川有涇渭灞滻

涇水出涇州至京兆入渭渭水出渭州歷秦隴岐京兆同華六州入于河灞滻

並出京兆入渭

厥賦絹綿布麻

京兆同華岐四州調綿絹餘州布麻開元二十五年勅關輔既

寡蠶桑每年庸調並宜折折納粟造米支用其河南河北不通水運州宜折租造絹以替關中

厥貢岱

赭鹽山角弓龍鬚席菴容野馬皮麝香

京兆粲草席地骨白皮酸棗仁

華州茯苓茯神細辛同州鞞文吉莫皮岐隴涇寧廊坊丹等州龍鬚席原夏等州白氍夏州角弓鹽州鹽山會

州馳褐靈州鹿角膠岱赭花蓂蓉鵬翎靈州豐州野馬
皮勝銀等州女稽布邠州火鋤剪刀華豆澡豆丹延慶
等州麝香遠夷則控北蕃突厥之朝貢焉二曰河南道古豫

兗青徐四州之境今河南府陝汝鄭汴蔡許豫潁陳亳

宋曹滑濮鄆濟齊淄徐兗泗沂青萊登密海凡二十有

八州焉東盡于海西距函谷南瀕于淮北薄于河

海水在青

萊登密海泗六州之境函谷在號州淮水出唐州歷豫
潁亳泗四州之南境黃河歷號陝河南汴鄭滑濮濟淄
青十州之境名山則有三嶠少室砥柱蒙山嶧山嵩岱二嶽

在焉

三嶠在河南永寧縣界少室在登封縣砥柱在陝
州河北縣蒙山在沂州費縣嶧山在兗州鄒縣中

嶽嵩山在河南告成縣東嶽泰山一名岱山在兗州乾封縣皆是

大川有伊洛汝潁沂

泗之水淮濟之瀆

伊出河南伊陽縣北流入洛洛出商州上洛縣經虢州河南入河汝水在

汝州潁水在潁州沂泗二水並出兗州淮水源在唐州桐柏縣濟水源在河南濟陽縣

厥賦絹絕

綿布

陝許汝潁州調以絕綿唐州麻布餘州並以絹及綿

厥貢紬絕文綾絲葛水

蔥薦心席瓷石之器

鄭汴許陳亳宋曹濮鄆徐等州絹汝州紬絕陝潁徐三州紬絕僊滑

二州方紋綾豫州鵞鵝綾雙絲綾著草基子潁州綿宛州鏡花綾齊州絲葛潁宛齊等州防風青州仙紋綾鄭

州麻黃許州薦心蓆登州水蔥蓆陝州括蓆根栢子仁曹州蛇牀子齊州阿膠泗水貨布沂兗等州紫石英萊

登密等州牛黃登州文石器海密等州布海州楚布萊州石器河南府瓷器

遠夷則控海東

新羅日本之貢獻焉三曰河東道古冀州之境今太原

潞澤晉絳蒲號汾慈隰石沁儀嵐忻代朔蔚雲

魏州或屬河南

凡十有九州焉東距恒山西據河南抵首陽太行北邊

匈奴

恒山太原之東河水經嵐石隰慈絳蒲六州之西境首陽在蒲州南太行在澤州南

其名山

則有雷首介山霍山崢山

雷首在蒲州介山在汾州霍山在晉州崢山在代州一名

五臺

其大川有汾晉及丹沁之水

汾水出忻州歷太原汾晉絳蒲五州入河

晉水出太原晉陽入汾丹水出澤州沁水出沁州歷晉絳澤三州至懷南入河

厥賦布繡

蒲州調以

繡餘州並用麻布

厥貢頹扇龍鬚席墨蠟石英麝香漆人蔘

太原

龍骨甘草礬石銅鐵潞州墨人蓼花密兔絲子澤州白
石英野鷄禹餘糧晉州蠟燭絳州防風蒲州龍骨竹扇
魏州硯瓦地骨白皮汾州石膏慈州蠟隰石二州胡女
布晉汾二州龍鬚席儀澤潞等州人蓼嵐魏忻等州麝
香忻州豹尾代州熟青熟綠朔代
二州白鵬翎蔚州松子雲州鵬翎

四曰河北道古幽冀

二州之境今懷衛相洺邢趙恒定易幽莫瀛深冀貝魏

博德滄棣媯檀營平安東凡二十有五州焉

其幽營安東入管羈

縻州東並于海南迫于河西距太行恒山北通渝關薊門

海在棣滄幽平營五州之東河水經懷衛相魏博德棣七州之南境太行在懷州北恒山在定州西渝關在平州東薊門在幽州北其名山有林慮白鹿封龍井陘碣石之山恒

嶽在焉

林慮在相州西白鹿在衛州北封龍在趙州西井陘在恒州西碣石在營州東恒山北嶽在定

州恒陽縣

其大川有漳淇呼沱之水

漳水出潞州歷相洛邢冀滄入海淇水出衛州

與清水合歷魏貝德滄四州與漳水合呼沱在定滄二州界亦與漳水合

厥賦絹綿及絲

相州

調魚以絲餘州皆以絹綿

厥貢羅綾平紬絲布綿紬鳳翽葦席墨

相州

貢春羅孔雀等羅定州兩窠紬綾懷州牛膝洛博魏等

州平紬邢州瓷器魏州綿紬衛趙莫冀等州綿瀛深冀

德隸等州絹相州紗鳳翽席胡粉邢州絲布恒州羅定

州紬綾幽州范陽綾貝州白氊滄州葦席柳箱媯營歸

順等州麝香檀州安東府人蔘平州蔓荊子薊州

鹿角膠易州墨燕州墨豹尾安東單于野馬皮

遠夷

則控契丹奚靺鞨室韋之貢獻焉五曰山南道古荆梁

二州之境今荆襄鄧商復郢隨唐峽歸均房金夔萬忠

已上十六州
為山南道

梁洋集通開壁巴蓬渠涪渝合鳳興利閭

果

已上
西道

凡三十有三州焉東接荆楚西抵隴蜀南控大

江北據商華之山

江水自蜀歷渝涪忠
萬夔歸峽荆八州界

其名山有嶓冢

熊耳巫峽銅梁荆山峴山

嶓冢在梁州金牛縣熊耳在
商州上洛縣巫峽在夔州巫

山縣銅梁在合州石鑑縣荆山在
商州荆山縣峴山在襄州襄陽縣

大川則有巴漢沮洳

之水

巴水在合州界入江漢水源出梁州金牛縣初名
漾水一名沔水歷洋金均襄郢荆復七州至沔州

入于江沮水源出房州永清縣至
荆州界入江洧水出鄧州南入漢

厥賦絹布綿紬

梁利
隨均

荆襄雜用綿絹合州調以綿紬餘州並調以麻布

厥貢金漆蜜蠟燭鋼鐵芒消

麝香布交梭白縠細紵綾葛綵綸蘭干

利州貢金鋼鐵
荊州交梭縠子

方縠紋綾襄州漆隱起庫路真鄧利果等州絲布襄均房商等州麝香復郢開等州白紵隨州綾唐州絹峽州

芒消歸州紵麻布金州麤金萬州金忠州蘇薰席梁州燕支紅花洋州白交梭壁巴達通忠渠等州綿紬集通

合等州白縠子通州絳香渠州賈子木并子漳州連頭

豫布渝峽隨等州葛合州牡丹皮閬州重蓮綾襄州白

縠鳳州蠟燭巴州蘭干布房州紵襄州烏漆

碎石文漆器白綸巾興鳳集夔等州蜜蠟

六曰隴右

道古雍梁二州之境今秦渭成武洮岷疊宕河蘭鄯廓

已上隴西

涼甘肅瓜沙伊西北庭安西

已上河西

凡二十有一州

焉其秦梁鄠洮北庭安西甘岷又管羈縻州東接秦州西逾流沙南連蜀及

吐蕃北界朔漠流沙在沙州已北連延數千里其名山有秦嶺隴坻西

傾朱圉積石合黎崆峒三危鳥鼠同穴秦嶺在秦州上邽縣隴坻在清

水縣西傾在洮州之西南朱圉在秦州伏羌縣積石在

河州枹罕縣合黎在甘州張掖崆峒在肅州福祿三危

在沙州燉煌鳥鼠其大川則有洮水弱水羌水洮水出西羌中

同穴在渭州渭源歷岷蘭二州界入河弱水在甘州河湟及休屠之澤在

焉河水歷廓河鄠蘭等州厥賦布麻厥貢赭金礪石基

石蜜蠟蠟燭毛毼麝香白氎及鳥獸之角羽毛皮革廓

二州貢麋金宕州散麋香沙州碁子肅州礪石成州武
州蠟燭洮州毛毯涼州毯布甘肅涼瓜等州野馬皮西
州白毯氍瓜州吉莫皮伊州陰牙角胡桐律鄯州犛羊
角野馬皮岷秦二州龍鬚席犛牛尾鵬翎秦州芎藭肅
州肉蓯蓉栢脉根瓜州草豉子北庭州速霍角陰牙角
阿魏截根安西緋氈礪砂陰牙角毼毛甘沙渭河蘭疊
等州麝香遠夷則控西域諸戎之貢獻焉七曰淮南道古揚

州之境今揚楚和滁濠壽廬舒蘄黃沔安申光凡一十

有四州焉東臨海西抵漢南據江北距淮海在揚楚二州東漢在沔

州淮水經中光壽濠楚五州北境入海其名山有八公

灊大別霍山羅山塗山

八公山在壽州壽陽縣大別山在壽州霍山縣霍山一名天柱

在舒州懷寧縣自漢以來為南嶽隋文帝開皇九年以
南嶽山為南嶽廢霍山為名山羅山在申州塗山在濠

州鍾離縣

其大川有滁肥之水巢湖在焉

滁水源自廬州合
肥縣巢湖在合肥

巢二縣界

厥賦絕絹綿布

淮南道庸調雜有紵紬火麻等布
壽州以絕布綿麻安光二州麻紬

絕絹申州綿絹

厥貢交梭紵絺孔雀熟絲布青銅鏡

揚州進青銅鏡莞席

細紵廬州交梭申光二州貢絺紵葛楚州貢孔雀布和
州紵練滁沔二州麻紬布蘄舒二州白紵布黃州紵紬

布烏蛇安州青紵布壽廬光等州
生石斛壽州葛布廬州貢熟絲布

八曰江南道古揚州

之南境今潤常蘇湖杭歙睦衢越婺台溫明括建福泉

汀

已上東道

宣饒撫虔洪吉郴袁江鄂岳潭衡永道邵澧朗

辰錦施南溪叙思黔費業巫夷播漆珍凡五十有一州

焉黔中又管

東臨海西抵蜀南極嶺北帶江

海水在蘇杭越台溫

括泉福八州之東江水經岳鄂江宣潤常蘇七州之北入海

其名山有茅山蔣山天

目會稽四明天台括蒼縉雲金華大庾武夷廬山而衡

嶽在焉

茅山在潤州丹陽句容二縣界蔣山一名鍾山在潤州江寧縣天目在杭州於潛縣會稽在越

州山陰縣四明在餘姚縣天台在台州始豐縣括蒼縉雲皆在括州金華在婺州大庾在虔州南康縣武夷在建州崇安縣廬山在江州尋

陽縣衡山在衡州湘潭縣

其大川有浙江湘贛沅澧

之水洞庭彭蠡太湖之澤

浙江水有三源一出歙州一出衢州一出婺州歷睦杭越

三州界入海湘水出桂州湘源縣北流歷永衡潭岳四
州界入洞庭贛水經虔吉洪三州界入彭蠡沅水歷平
辰朗岳四州界入洞庭澧水源出澧州石門縣至岳州
界入洞庭湖洞庭在岳州巴陵縣界彭蠡湖一名官亭
湖在江州尋陽縣界太湖
在蘇常湖宣四州縣界
厥賦麻紵
潤州調火麻餘
州並以紵布厥

貢紗編綾綸蕉葛練麩金犀角鮫魚藤紙朱砂水銀零

陵香

潤州方基水波綾常州紫綸布兔褐蘇州紅綸布
杭越二州白編睦越二州交梭衢婺二州藤紙綿

越州吳綾建州蕉花練福州蕉海蛤泉括二州綿饒衡
巫等州麩金犀角洪撫江潭永等州葛蘇州吳石脂吳
蛇牀子台州金漆乾薑甲香江州生石斛鄂江二州銀
永州石燕道州零陵香澧州龜子綾五入葦朗州紵練
辰錦二州光明砂水銀溪錦二州朱砂常湖歙宣虔吉
袁岳道等州白紵布施宣二州黃連宣州綺南州班布

思黔費業漆珍等州蠟夷
州蠟燭溫台二州鮫魚皮

遠夷則控五溪之蠻九曰劍

南道古梁州之境今並蜀彭漢綿劍梓遂普資簡陵阡

眉野嘉榮瀘戎黎茂龍扶文當松靜柘翼悉維篤姚凡

三十有三州焉

其黎戎瀘茂松篤姚又管羈縻
州靜柘翼悉維五州並管羌夷

東連牂

柯西界吐蕃南接羣蠻北通劍閣

劍閣在劍州普安
縣界今謂之劍門

其

名山有峨眉青城鶴鳴岷山

峨眉山在嘉州青城在蜀
州鶴鳴在蜀州晉源縣岷

山在岷州劍南
道之西界北

其大川有涪雒及西漢之水江瀆在焉

涪水歷松龍綿梓遂合六州界入江雒水出漢州什邡
縣經益簡資瀘四州界入江西漢水歷利閬果合四州

界入江大江水自松州甘松嶺經翼茂彭
蜀益陵眉嘉戎瀘十州之界入山南道
厥賦絹綿葛

紵
瀘州調以葛紵等布餘州皆用綿絹及紵布
厥貢麩金羅綾綿紬交梭彌

牟布絲葛麝香羚羊犀牛角尾
益蜀二州單絲羅益州高杼衫段彭州交梭簡

州綿紬漢州紵布彌牟布綿州雙紉梓州遂州擣蒲綾
戎普瀘等州葛叩劒窩等州絲布龍雅眉嘉資等州麩
金姚茂扶靜文悉松維當拓翼等州麝香劒州蘇薰席
普州天門冬煎崇州班布黎州蜀椒龍州羚羊角當靜
柘等州當歸羌活松州狐尾悉州
當歸犀牛尾維州犀牛尾姚州金
遠夷則控西洱河羣

蠻之貢獻焉十曰嶺南道古揚州南境今廣循潮漳韶

連端康岡恩高春封韓瀧新潘雷羅儋崖瓊振
已上廣府管内

桂昭富梧賀龔象柳宜融古嚴

已上桂府管内

容藤義賓禺白

廉繡黨牢巖鬱林平琴

已上容府管内鬱林平琴二州複名

邕賓貴橫欽

潯瀼龍田武環澄

已上邕府管内

安南驩愛陸峯湯長福祿龐

已上安南管内福祿一州複名

凡七十州焉

其五府又管羈縻州

東南際海西極

羣蠻北據五嶺其名山有黃嶺及鬱水之靈洲焉

黃嶺在廣

州賓安縣靈州在廣州南海縣鬱水之中

其大川有桂水鬱水

桂水出桂州臨源縣歷昭

富梧三州界入鬱水鬱水一名浪水歷藤梧封康端廣六州界入海

厥賦蕉紵落麻

廣州等調

以紵布端州調蕉布康封二州調以落麻布

厥貢金銀沉香甲香水馬翡翠

孔雀象牙犀角龜殼龜鼈絲藤竹布

融象二州貢金桂
邕昭柳等五十餘

州貢銀桂州銅盤連州細布鍾乳崖欽二州高良薑廣
州竺席生沉香馬甲香龜鼈皮藤簞廣州安南並貢
龜殼循振二州五色藤盤振州班布食單安南及潮州
蕉安南檳榔鮫魚皮翠毛愛麗等州孔雀尾驪州象牙
藥犀角金薄黃屑沉香漳潮等州鮫魚皮甲香韶州竹
子布岡州甲香詹糖香廣潮高循峯邵等州及安南蚬
蛇膽春韶瀧廣等州石斛雷州絲電富州班布白石英
蒙州麝金古州蠟客州朱砂銀欽州翡翠毛陸州玳瑁
鼈皮翠毛甲香峯州荳蔻福祿邵二州
白蠟福祿龐二州熬餅朮昆州桂心 其遠夷則控百

越及林邑扶南之貢獻焉凡天下之州府三百一十有
五而羈縻之州蓋八百焉京兆河南太原為三都潞揚

益荆幽為大都督府單于安西安北為大都護府安南

安東北庭為上都護府涼秦靈延代充梁安越洪潭桂

廣戎福為中都督府夏原慶豐勝營松洮鄯西雅瀘茂

雋姚夔黔辰容邕為下都督府同華岐蒲為四輔州

蒲新

升陝懷鄭汴魏絳為六雄州

絳新

升號汝汾晉宋許滑衛

相洺為十望州

汾新

升安東平營檀媯蔚朔忻安北單于

代嵐雲勝豐鹽靈會涼肅甘瓜沙伊西北庭安西河蘭

鄯廓疊洮岷扶柘維靜悉翼松當戎茂雋姚播黔驩容

為邊州四萬戶已上為上州

陝汝鰲僊澤邠隴涇寧廊坊戶雖不足亦為上州

二萬戶已上為中州不滿為下州凡三都之縣在城內

曰京縣

奉先同京城

城外曰畿縣又望縣有八十五焉

同州馮翊

朝邑澄城白水郃陽華州鄭縣華陰下邽岐州雍縣扶風陳倉陝州陝縣桃林硤石河北芮城鰲州閿鄉湖城鄭州管城縣陽武新鄭滎澤汴州浚儀開封尉氏雍邱宋州宋城滑州酸棗兗州金鄉許州扶溝汝州梁縣徐州襄城蒲州河東桑泉安邑虞鄉汾陰猗氏解縣絳州正平龍門夏縣聞喜翼城晉州臨汾洪洞汾州隰城平遙介休潞州上黨懷州河內武德武陟獲嘉魏州貴鄉魏縣昌樂頓邱元城相州滏陽洺州永年冀州信都南宮瀛州河間深州饒陽益州成都蜀縣郾縣新繁彭州九隴導江蜀州晉原青城漢州雒縣潤州曲阿江寧常

州晉陵蘇州吳縣杭州餘杭越州會稽婺州
金華荊州江陵襄州襄陽揚州江都揚子
其餘則六

千戶已上為上縣二千戶已上為中縣一千戶已上為
中下縣不滿一千戶皆為下縣凡天下之戶八百一萬
八千七百一十口四千六百二十八萬五千一百六十

一開元二十二年數百戶為里五里為鄉兩京及州縣之郭內


分為坊郊外為村里及村坊皆有正以司督察

里正兼課植農

桑催調賦役四家為隣五隣為保有長以相禁約凡男女始

生為黃四歲為小十六為中二十有一為丁六十為老

每一歲一造計帳三年一造戶籍縣以籍成於州州成
於省戶部總而領焉



通志卷四十